

玉王
少司
城馬
奏奏
疏疏





王少司馬奏疏卷一

明 長垣王家楨著

請給兵餉關防疏

奏爲督剿必需兵餉、總理必需關防、伏祈聖明俯給、以資實用、以重事權、以早奏蕩平事、爲照流寇爲害、蓋數年于茲、其殺掠之慘、根本之憂、亦既中外咸知之矣。臣最寡昧、猥蒙皇上拔之草莽之中、付以督剿之任、捐糜圖報、正此其時、先是河南巡撫、五省總理兩臣各分寄之、今一旦并寄之臣、是以臣之一身、兼兩人之責任、其負荷倍爲繁鉅、臣之拜命、殊亦倍爲兢惕、除剿撫機宜、俟受事後、詳審竅竅外、所亟需者、不過曰兵、曰食、曰法而已矣。以兵言之、前理臣盧象升原所督理之全數、每見寡不敵衆、今撤回如許、不更寡乎、卽云募練、恐費時日、倘各省所報勤王兵馬、以及臣理屬地方本省無事者、暫留剿賊、待招募成旅、發回有功一體敍賚、似亦權宜之最便也。以餉言之、盧象升在事、歲留新餉若干、未聞寬裕、今所辦之賊如故、所需兵馬如故、一旦頓去前餉、能免呼庚之虞乎、設處之名一立、將開漁獵之資、且州縣之設處、各自供鄉勇之團足矣、能充軍需之用乎、至于因糧輸餉、尙乏確數、此項但能足用、自可不需部餉、惟是以京邊參罰之嚴、拖欠者纍纍、而總理之催提、豈能必徵解之如期、似宜確查額數、嚴立參罰之條者也。以法言之、今天下在在無法、而行間爲甚、官則旣怕死、而又要錢、兵則旣毒民、而又和賊、若不重新整頓、

改絃易轍。洗盡肺腸。而欲賊之平也。無日矣。臣受事後。有搶掠良民。通賊納賄者。臣訪查有據。立戮而曉示之。必先除此病根。而後可幾實效耳。然用人尤屬喫緊。蓋地聯五省。既渙散而難統。亦繁浩而易蒙。非羣策羣力。集思廣益。恐一己之精力有限。識慮有不周之處。則夫文職之監軍。監紀。武職之大將。偏裨。須得同心戮力之人。所用一不當。而事去矣。顧人不易知。知人亦不易也。臣聞有廢閑總兵劉超者。熟諳兵法。試有實效。當此多事之際。而棄此有用之人。殊爲可惜。況抒胸中之蘊。造桑梓之福。亦超之所必願也。似宜以原舊職銜。隨臣標下。資調度之用。俟有成績。再請實授。至于巡撫關防。止宜用之巡撫。應行文移。若事關總理。而仍用之五省直隸。非所以核名實而正體統也。似宜另鑄。必不可少。伏祈敕下戶兵二部。確查因糧輸餉一項。某縣若干。某省若干。合之得總數若干。自某季起。派解過若干。拖欠若干。明年徵派何法。查參何法。一一詳議明白。行臣遵守。勤王之兵。有抵理屬地方者。覆議暫留剿賊。再請欽賜總理直隸五省關防一顆。頒給。以便文移往來。所有敕書二道。舊例親領。惟念中州土流并發。臣早到一日。早效一日之力。伏祈皇上准臣陛辭先行。留官齋領。蓋奉有星速之旨。臣不敢不欽承。皇上嘉惠元元之至意也。爲此具本。謹具奏聞。崇禎九年十月初四日具奏。本月初五日奉聖旨。奏內兵餉事宜。并劉超。該部看議。速奏。官兵搶掠殺良。通賊婪賄。殊可痛恨。參遊以下。立正軍法。鎮將指參重處。王家楨著星速赴任。料理。敕書關防。卽鑄辦。續發。該衙門知道。兵部覆。看得各省勤王之兵。非不絡繹先報起程。彼原在近境。各探賊信。以爲進止。既俱奉有撤回之旨。計此時必返旆星馳矣。其從理屬地方經過者。恐亦無幾。如正與

賊相遇。而本省不煩回顧者。自當檄令協剿。以圖共濟。至所請劉超。昔在黔中。曾有解圍之功。臣部已議起用。今應著理臣調至軍前。以原銜效用。俟有功績。另議推授可也。等因。崇禎九年十月十二日。奉聖旨。這劉超。著以原銜赴理。臣軍前效用。有功另議優敘。戶部覆。該臣等看得。因糧輸餉。舊理臣盧象升。專爲寇患。奏請臣部酌議。蒙皇上允行。原議事平。卽止。今流寇蕩平。尙未有期。而增兵增餉。方苦無措。不得不再行。以供防剿之需。初定鄉紳糧銀一兩以上者。輸銀貳錢。舉監以下。糧銀五兩以上者。每銀一兩。輸銀一錢。不及五兩者。免。此皇上軫惠小民之盛意也。惟是五兩上下之間。書役飛灑詭寄。易於作弊。有司或不能覺察。或甘于扶同。任意開報。乘機隱漏。不惟將多作少。抑且免富徵貧。是徒有捐助之名。而究于軍需無補也。王某新膺討賊之寄。籌及兵餉。疏稱。因糧輸餉。尙無確數。恐不敷用。誠爲遠慮。臣等再爲酌議。合無鄉紳仍照舊輸助。舉監以下。糧銀自五兩以上。并五兩以下者。每銀一兩。量輸銀五分。數較減而法亦適均。悉照正糧勸輸。仍將應輸銀數。州縣冊報司府。司府彙報督理臣。并臣部查核。其在河南、湖廣、南直、浙江、江西、福建、廣東、廣西。因糧輸餉。解河南布政司。專充總理軍餉。其在山西、北直、山東、四川、雲南、貴州。因糧輸餉。并陝西鄉紳富民輸助。解陝西布政司。專充總督軍餉。務期勒限徵輸。無誤軍興。尙有司奉行不力。愆期不完者。督理兩臣。各按前定省直。據實查參。臣部照新餉考成例。一體議處。各省直有防兵者。應用銀數。一并酌定報查。此明年徵派查參之法也。至殘破州縣。仍遵前旨。免其輸助。以恤災黎。其九年應輸若干。解過督理軍前各若干。本省防兵留用若干。未完若干。應令各該司府逐一查明。冊報臣部。

查考督理二臣收過某某省直輸助銀若干共收過若干支給某某官兵行鹽料草銀若干共放過若干有無存剩若干亦須明白造冊速報臣部以便磨對至于虔撫潘奏議欲將此項輸助在無事地方與舟楫易通處所徵解本色亦屬正論惟是兵無定向勢難千里饋糧而無事地方未必可通舟楫矧徵折文已通行紛更恐滋稽誤似不若仍舊輸銀之爲便也既各條奏前來相應併議覆請恭候命下臣部通行各該省直遵奉施行等因崇禎九年十月十五日具題本月十八日奉聖旨這因糧輸餉責成郡邑有司親查冊籍不許以胥役開報飛詭隱富累貧前旨甚明該撫按何無體察究參若不拘五兩之額仍照糧每兩輸銀五分與加派何異且舊歲輸數尙未清核又輒議紛更徒滋婪猾官胥乘機侵濶科擾豈成政體不准行還著飛檄各該撫按將輸過確數若干地方防兵用過若干併督理剿餉收過若干通行詳查報部照例考成仍一面勒令完解以濟急需立嚴限去其分省解交秦豫二藩司及仍徵折銀依議

入境報代疏

奏爲恭報到任事臣于十月初六日陛辭遵星速之旨兼程前行至十一月初三日入豫屬封丘縣准前撫臣陳必謙咨送敕諭六道符驗一道令旗牌八面副關防一顆併吏書文卷到臣臣卽刻恭設香案望闕叩頭謝恩訖先是十月初五日在京准前理臣盧象升咨送令旗牌十面副併吏書文卷于京城門外到臣已經領受臣卽于封丘署中開印行事訖伏念臣碌碌庸流學未嫻于軍旅經經鄙士任奚當于師中況值流土交訏之秋更屬兵疲民殘之後蒼生之流離載道何以措諸衽席不愧撫綏之名綠林之猖

獫愈滋。必須盡數掃除。始塞督理之責。此臣自拜命以來。夙夜不遑甯處者也。惟是臣心不敢不盡。臣力不敢不竭。察吏而民可安。力剿而撫可成。剿不力則以撫誤。而必不可撫。吏不察則致民恨。而并壞其吏。故言察吏于今日。卽以寇察可也。未有寇徧于野。而猶得云官稱其職者。言平寇于今日。卽以吏平可也。防禦有素。寇來必不得志。饋餉有法。兵到可期。成功若夫兵之害民。尤甚于盜。將之畏兵。猶夫畏賊。此紀法不明之故。業奉有立正軍法之明旨。臣第有遵行必力而已。至于議兵議餉。一切調度機宜。容臣會同督撫按道。次第舉行。然必虛心而審要領。實做而考成效。庶于地方有裨。臣才無可恃。所恃者。聖天子之寵靈。共事文武諸臣之同心協力。庶幾免于罪讐。以無負皇上之委任而已矣。容臣商確至當。然後見諸施行。蓋體統職掌。自有成例。不敢不預行奏明。臣無任感戴。激切屏營之至。崇禎九年十一月初四日具奏。本月十五日奉聖旨。知道了。豫中荒盜頻仍。秦楚等省。流氛未殄。王家楨著悉心料理。早奏廓清。以副倚任。其地方重大事情。并著遵旨。密切速行。不得藉口成例卸責。該部知道。

敬陳流寇情形并分布方略疏

題爲敬陳目前流寇情形。並及微臣分布大略。仰祈聖鑒事。竊思臣以菲才。謬蒙皇上特簡。付之全豫。更重以總理之任。日夕負乘是懼。惟是時事多艱。主憂臣勞之會。不敢不勉竭駑鈍。用報聖明於萬一。顧臣此時專以督剿爲急。自入境日。卽確詢近日流寇出沒情形。知寇盤踞河南南陽兩郡。在南陽爲混十萬。始蜩圓諸股。在河南爲瓦背。紅旗諸股。案查前撫臣陳必謙。委監軍道臣戴東旻。監紀湯開遠。督左良玉。

羅岱兵屢挫寇鋒于南陽之田家營等處。節經塘報。後寇遂從內鄉分股。一走瓦屋。犯雒之嵩澗。一走馬山口。犯宛之鎮平。前撫臣遣左良玉兵。回洛堵剿。而留陳永福、江樞、孔道興三營千鎮平。彼時前撫適聞解任之報。而臣當未入境之時。諸將遂彼此觀望。故寇仍盤踞南陽之石橋諸處。而時出精騎肆掠。臣在途聞之。中心如焚。到任前一日。值湖廣監軍道臣張大經同戴東旻來謁。卽委督朱文進、楊從義所領川滇兵千餘。亟赴宛會剿。而臣與按臣楊繩武復商確機宜已悉。卽于十三日。親赴宛調度。及行抵葉縣。報寇聞臣兵至。已拔營遯入寶豐、魯山矣。魯寶爲汝州屬界。連登邾神垕諸山。寇憑于此。負險恣毒。臣亟調陳永福、江樞兵。從南召羅岱、孔道興兵。從裕州。分道搜剿。雖途中屢報斬獲。臣仍行確查。不敢以小捷爲功。又嚴飭左良玉。剿寇之在嵩洛者。且與永福兵。彼此呼吸相應。據逃出難民。每稱寇踞宛洛。俟冰堅渡河。臣又一面檄河北守巡兩道。親督兵駐河上要害。多設火器。悉力防禦。又一面飛催王忠牟、文綬兵。星馳赴豫堵剿。總之寇在中州者。臣當鼓勵文武。早圖殲滅。固不問寇之渡河不渡河也。但臣責在總理。又難以方隅自畫。今豐沛、畿輔及三晉。仰邀皇上威靈。蛇豕未卽窺逞。而秦自闖賊就擒。督臣洪承疇與撫臣孫傳庭。操縱互用。亦似掃蕩可期。而寇之在荆襄者。勢同困獸。撫臣王夢尹與治臣苗祚士。合力芟除。臣亦委標下都司戴啓榮前往荊州。催督龍在田率領調到滇兵六千。協剿楚寇。臣俟料理豫寇。稍有次第。當會督撫諸臣。熟計蕩平全局。蓋惟寇是求。秦越之視。非臣所敢出矣。至土寇之葉舞。向稱實繁。有徒自臣受事。尙未聞其蠢動。但查豫中被寇三年。獨宛洛兩郡。日展轉焚戮中。臣近過南陽。見州縣村落。無

非寇燼之餘。頽垣敗屋。幾無居人。嗟此子遺。饑寒所迫。安得不相從爲盜。雖法無可原。而情實可憫。臣仰體皇上愛民至意。諭分地方有司。以撫輯爲先務。卽鴟音難革。殲剿自不容已。臣當臨時斟酌。萬不敢養癰厝毒。重以憂貽君父也。除寇情飄忽。頃刻異狀。及一切兵食。應當裒益。與夫有司將領。宜分別查核。以昭勸懲者。容臣不時補牘外。謹將目前情形。及微臣分布方略。先具疏上聞。仰祈聖鑒。爲此謹具題知。崇禎九年十一月二十四日具題。十二月初九日奉聖旨。據奏流寇情形。及分布方略。知道了。賊狡踞深山。作何設奇。窮其出路。冰堅窺渡。作何扼禦。必保無虞。秦楚各賊。作何犄角。制其奔突。著會同督撫諸臣。打算全局。嚴飭主客兵將。合力協剿。并地方土寇。責成道府有司。上緊剿散。加意綏輯。務期速奏蕩平。以副倚任。如將領觀望逗怯。及地方官悠忽玩誤的。卽參拏究處。兵部知道。

恭報革降唐藩并繳紅本疏

奏爲奉旨革降唐藩押發。將行稱疾。恭繳紅本。以慰聖懷事。崇禎九年十月二十日。臣自京行至邯鄲公署。准兵部咨。爲公務事。職方清吏司案呈。本年十月十四日奏。本部送兵科送出紅本一封到部。相應差官齎送河南總理軍前密拆。捧誦見該宗人府等衙門掌府事。駙馬都尉等官。臣王等謹奏。爲遵旨確議事。奉聖旨。據奏該藩藐抗明旨。越關出城。已干法紀。至一日擅斃親叔兩郡王。蔑棄彝倫。悖違祖訓。莫此爲甚。卿等旣擬議僉同。憲典昭然。朕何敢私著革了爵。降做庶人。押發高牆禁錮。其世封。另選賢宗。以奉國祀。昭示朝廷。敦睦至意。仍告宗廟。寫書與各王府知悉。此疏密付王家楨。星馳前往奉行。欽此。欽遵。該

臣看得事關重大。雖臣奉密旨。仍宜知會按臣。故於報代疏後。預行奏明。隨於十一月初六日。渡河進省。與按臣楊繩武。再三面商。仍密探本藩動靜。悉其要領。卽於十三日南發。途中隨時隨地。調度兵將。堵剿流寇。至二十日。抵南陽。一時在事。除按臣及開封南陽二府推官外。無有知臣之奉有密旨者。二十一日。早。臣始一面照例移文按臣。會行按察司。及分守汝南道。一面查取儀注。公同唐藩。并文武各官。擡請龍樓。迎接聖旨。於公署恭設香案。叩頭宣讀畢。該臣恪遵明旨。當將唐庶人。面付分守汝南道臣周以典。隨據該道呈報。選委南陽府管糧通判張省度。南衛指揮王憲邦。夏之時。伴押唐庶人。情願於本月二十二日。早行。前往鳳陽。臣方待其出城。以便疏聞。至二十三日。過午刻。道府進臣署面稟。唐庶人。偶感痰火。臥牀不語。姑緩少愈。起程。一面催取起程日期。另報外。今將奉旨。遵行緣繇。合先奏聞。蓋自明旨一宣。唐庶人。猙獠之性。憤激欲死。闔郡宗庶。號泣訴冤。具狀赴臣。告理者。半日聚至百人。臣概未敢行。然白叟黃童。咸頌聖天子。天覆地載之中。有雷厲風行之用。施不測之恩威。銷莫大之隱禍。彝倫於是有主。國憲於是彰矣。至於本藩之傳國冊寶。應貯何處。庶人之眷屬僕從。應否攜帶。恭請明旨。定奪。非臣所敢擅專也。又據道府之口。其巨姦大惡。撥置煽惑。所以陷王於此地者。實繁有徒。若使漏網。恐法猶有未伸。容臣行道府。訪確事蹟。應提問者。提問。應參處者。參處。以雪地方之公憤可也。臣謹會同撫治鄖陽。右僉都御史苗祚士。巡按河南。監察御史楊繩武。合疏具奏。臣捧收紅本。恭隨進繳。爲此。理合具本。謹具奏聞。崇禎九年十一月二十四日。具奏。十二月初六日。奉聖旨。知道了。還著速催起程。仍嚴行防護。毋致疏虞。撥置姦

惡一面確訪。參提究處。不得株連無辜。其冊寶并攜帶眷屬事宜。該部看議速奏。禮部覆看得唐庶人奉旨降革。押發高牆。赫赫天威。法不親貸。誠義以行仁。消禍於隱。萬世彝倫之主。宗社無疆之庥也。冊寶爲一國之重器。眷屬係一家之至親。皇上慎所重而念所親。准該撫臣之請。敕下臣部議奏。臣等懷奉成規。查冊寶事宜。則有追奪之例矣。夫唐藩旣革。尙未有奉祀之人。卽賢宗繼立。亦應俟撫按查勘回奏。且冊以封王。寶以傳國。今旣革其王爵。自宜追其冊寶。合無照例請敕撫按。將冊寶恭繳內府收貯。儀仗服色。點明布政司收貯。俟選有賢宗之日。奉旨差官授封。并行頒給。查眷屬事宜。則有攜帶之例矣。顧眷屬之最親。惟妻妾子女而已。存留未革前所生。原以示罪人不孥之意。取送的親家口。又以示遷其私人之仁。合無照例請敕撫按。查其所生子女。在未革爵以前者。存留在府。責令相應親屬照管。其王妃。若引岷庶人妻李氏之例。似應竝行押發。至於僕從。不許多人。卽無罪。猶有收買之禁。況在降革。益宜節裁。合無請欽限僕從數名。供其役使。以杜滋蔓。總之恩威出自朝廷。非臣等所敢專擅也。伏惟聖明。裁酌施行。等因。具題。本月十六日。奉聖旨。這冊。著該撫按恭繳內府。寶與儀仗服色。該蕃司查明收貯本府。俟選有賢宗。另行頒給。賢宗著勒限公選奏奪。眷屬查所生子女。在未革以前者。存留在府。併庶人二母。俱諭令親弟侍奉照管。務在得所。其妻准併行押發。男女僕從。共准六名。供役。不許多帶。俱著嚴飭行。

議設監軍監紀疏

題爲督剿料理需人。亟議監軍監紀。以重事權。以便責成事。照得微臣荷蒙皇上知遇。畀以總理重任。苟

可殫竭以圖報稱。卽踵頂髮膚。何敢自愛。但從來戡定大亂。決非一手足之烈。必專得分理之人。庶不苦左謀右畫。而後廓清可圖。臣屬雖有司道各官。但刑名錢穀。俱有專司。旣難令其舍本等職業。戮力行間。計與臣朝夕其事。惟監軍監紀是賴。在河南監軍道。則有戴東旻。臣見其才優盤錯。近與商確布置。每多中窳。但本官仍分巡河南。自有簿書之煩。信地之責。故豫地尙可資其料理。若越境問寇。勢有不能。且軍機倏忽變幻。須朝夕追隨。面相商確。而後無失機宜。則監軍非專官不可。況見今有湖廣參議。管監軍事。張大經。以練達之才。果銳之氣。向在楚中監紀。同前理臣剿寇東南。著有成勞。復以督兵入援。前理臣題陞今職。今入援事竣。自應隨臣辦寇。但監軍一官。稽核將領功罪。與料理一切兵馬錢糧。責任最鉅。若不重其事權。將事多掣肘。力鮮從心。合無令大經卽以原官到任河南。爲臣總理監軍。仍照例給與敕書關防。以便行事。庶大經益有所藉。以展新猷。佐捷伐。此監軍專設議。有必不容緩者也。至監紀雖係廳官。而臣之委任。責成與監軍同。查得原任開封府推官。今充爲事戴罪監紀湯開遠。明敏剛直。屢經督理兩臣疏薦。而以狂瞽自干聖譴。幸際皇上如天之容。出之羈縻。使得終效馳驅。臣細查開遠再入中州。感激聖恩。益加策勵。如督關兵入秦。督援兵至邯鄲。皆以單騎奔馳。烈日淫雨中。至調停兵民。催集餉料。備極苦心。近督左良玉兵。剿寇南陽內鄉。如田家營諸捷。開遠皆身披鎧甲。督戰陣前。又督陳永福三營。扼寇於鎮平裕州。區畫堵禦。使狡賊不敢東下。皆歷歷在人耳目。臣復查開遠向以司理從戎。已歷俸三年。今黽勉行間。又幾一載。臣因其方沐皇上赦過之仁。未敢更爲侈叙。但臣監紀不能舍此借材。而今日監紀較

往日倍重。若以一職銜未實之官。拮据軍前。在開遠雖不敢不勉圖報效。而將士未免以白眼相視。臣亦目擊其情狀。未易責成。儻蒙皇上俯念監紀萬難輕委。而開遠微勞亦足自贖。免其爲事戴罪。仍以原任職銜。在臣軍前監紀。俟再有勞動。容臣另行酌請。庶體統有資。展布亦便。於督剿未必無少補矣。蓋監軍監紀於軍前最爲關切。臣不過就見在二官。請爲安置妥當。以鼓其氣志。萬不敢瞻徇情面。委任非人。至誤封疆。并以自誤也。如果臣言不謬。伏祈敕下該部。速行議覆施行。崇禎九年十二月十一日具題。本月二十二日奉聖旨。該部卽與議覆。

恭報南陽災荒請蠲錢糧疏

題爲宛南成屯難之世。微臣得目擊之真。謹據實上聞。伏懇聖明。破格軫恤。以救子遺。以安地方事。崇禎九年十二月二十一日。據南陽府申。爲勢實難已。仰述一方極敝之形。時委莫支。懇冀九重破格之惠。謹冒死控陳。以免慢殘事。據鄧裕南唐等十三州縣合詞申稱。南陽瘠土也。其隸于豫省。土地人民。原不能比于七郡。而近日寇荒之慘。復數倍過之。以歲荒言。其爲大災者三。自崇禎四五年。連歲不登。雖非大稔。然家無蓋藏矣。至六年冬。無片雪。七年春。無點雨。而麥事全失矣。人之敝亡者。十一二矣。八年入夏。霖潦。六七月旱乾。加以飛蝗蔽空。齧穀黍殆盡。故本年之冬。米麥每斗錢三百文。豆一斗錢二百文。至九年春。米麥每斗錢五百文。豆一斗錢三百文。甚至無有賣者。以故閭里之間。或啖木皮。或食人肉。或化而爲盜賊。逃而之他鄉。重以瘟疫盛行。家無遺口。人之散亡者。十之六七矣。至八年秋冬不雨。全無麥苗。九年

五六月霖雨如注。禾稼漂沒。豆黍禾十不得二。而耕牛半遭厲疫。半飽賊盜。所存者亦十不得三。故入冬而米麥每斗錢四百文。豆一斗錢三百文。此數皆八年冬未有之價。而入十年之春。價倍騰踊。其啖木食人化爲盜賊。而相繼散亡者。自當倍於九年之數者也。故水溢旱乾。蝗蝻之三災。其并茲一方者。他郡無有也。其爲寇害者三。自七年冬。流賊入豫。卽躡南陽。所至人民屠戮。室廬焚燒。男婦老幼之慘。不待言矣。然南陽所屬多山。動爲賊所盤踞。有一二月或三五月不去者。如混十萬。老回回之類。至有經年踞南陽縣。暨鎮內山中不去者。然非坐食于山林也。步騎出沒。號曰打糧。則所至一二百里之外。無日不經歷。南陽之士也。且賊入秦。入楚。入江北。南陽實爲咽喉之地。是又無空日矣。至於官兵所至。寇或暫避。而兵復流連。又經旬日。旬月不去。其芻糈之給。米則官價每斗七分。而本縣以五百錢糶而給之。豆則官價每斗六分。而本縣以三百錢糶而給之。此職之所日夜躊躇。而身家不足以賠償。歲凶不異於募化者也。故賊盤踞住過之害。其滋於一方者。他郡所未有也。以故民甘攘奪。田皆荒蕪。職每出郭。見有掃草子者。剝樹皮者。嬰兒棄於道旁。甫聽呱呱。旋爲人割而食者。其村鎮。則有一街房屋。燒燬強半者。有屋徒壁立。無人住居者。間有數人。從破屋而出。則菜色鳩面。竟似鬼形者。其道路。則蒿萊蕪塞。行數十里。無一人煙者。至職等出堂。則有告竊衣者。竊糧者。竊牛隻者。蓋民非逃亡。卽化爲寇盜。而求其輸納租稅。勉作善良。十不得一矣。斯時欲爲繭絲。忍行敲朴。則人不受。欲緩催科。自違功令。則時不能。且降罰在身。欲行解組。則勢不可。惟有俛首以罹法。束身以待斃而已。爲今之計。寇不能使不來也。兵不能使不至也。嘔心而籌救

荒勸輸則無富民。發倉則無夙儲也。宴坐而聽之。民盡化爲賊盜。地將等於甌脫。卽褫職一官。戮職一身。不足以謝一郡之民。而朝廷之事去矣。故必九年十年。盡蠲租稅。以聽民之生聚。然後可。乃聖恩不獲驟邀。卽邀之。而蠲一分二分。不足以紓民重困。且九年之春。朝廷不特賑南陽一郡乎。然春時米糧之價。已甚于今冬。而遙計十年之春。則更甚也。且賑者有所予。而徵者有所取。所予者。未盡更生。而所取者。先不堪命。暮四朝三。何裨實濟。故不如蠲徵之計長也。職等籌畫再四。謹將南陽一郡極敝之形。盡言上告。伏乞轉申特奏等因。據此。該本府知府楊惕知。看得國家則壞成賦。歲有額輸。上關軍國之急需。無容或緩。且軍興浩繁。司農仰屋。凡爲守令者。銜一命而來。誰不思急赴功令。以免參罰。況茲計典森嚴。考成之功。罪係焉。肯不力爲徵解。自安於逋欠。而甘以其身名試法也。無如今日南陽所屬郡邑。災荒已極。賊害無窮。人民死亡逃散殆盡。土地荒蕪。供賦無人。催科無策。窮民不支。寇盜愈繁。大變將作。不得不懇恩大施。惻隱速允題請。將九年十年錢糧。蚤行蠲免。以救此一方子遺。以存此一塊境土也。蓋南陽一郡。地磽民貧。原與豫中七郡不同。百姓僅守耕鑿。絕無經營貿易之利。無奈宛民不造。自五六年來。連歲災侵。非水卽旱。民已十室九空。皮骨僅存。迨八年夏秋。蝗蟲食稼。蔽空漫地。顆粒不收。三冬無雪。二麥不播。故九年之春。刮樹食人。填轉溝壑者。相枕也。正初薄雪。略種春麥。饑民望眼如穿。忍死以待一飽。詎意四月五月。連旬大雨。平陸成河。登場之麥。盡漂在地。之禾。淪沒。民生愈促。然而一二高阜者。尙望秋熟。少延殘喘。乃六七八連月陰潦。禾豆又溷爛無餘。十不得其一二。加以瘟疫盛行。傳染者。人畜俱斃。有一門而死數

十人者。有全家死盡。無人收拾者。目今米麥每斗四五百文。豆一斗亦不下三百文。哀哀小民。不惟無錢可買。卽樹皮草子。亦無處可覓矣。是民之厄于時者如此。流賊自渡河以來。蹂躪宛南者。無慮數十次。所過之處。不惟財帛糧畜。席捲無遺。房屋器具。一炬而盡。老幼作刀頭之鬼。壯丁少婦。擄爲賊中之用。況宛屬地當子午之衝。北枕汝雒。南接楚襄。東連汝潁。靳黃。西鄰商陝。均鄖。賊之東西南北。勢所必經。賊依山爲勢。宛屬山多。賊每窟穴其中。哨馬四散打糧。動經連旬數月。故受害獨甚于他鄉。賊至則兵來。追剿者動支數日之糧。駐防者輒經半載之久。民間粒粟寸草。又爲兵盡矣。民窮之極。不能坐以待死。聚黨糾徒。肆行焚劫。流賊所未盡者。又盡于土賊矣。是民之厄于人害者。又如此。豫中八郡。卽有賊殘之處。總未有若宛屬之民。死于賊。復死于歲。望絕煙火。地盡荒蕪。一子遺。鵲形鵠面。奄奄待斃。與鬼爲鄰。真有鄭繪難圖。筆舌難罄者。錢糧之催檄。不啻電掣雷轟。有司之催徵。有同望梅畫餅。不惟無人戶可比。抑且無里長收頭可問矣。目下之旦夕。已覺難支。入春之洵洵。更慮不測。勿謂職言之不蚤也。聖明素知南陽有七年連荒之苦。不難發御膳之金錢。急遣使以回殘喘。豈忍復竭饑民之枯髓。而不蠲此涓滴之稅。以救災餘。懇祈洞察民艱。急賜拯救。速爲題請蠲免。庶州縣印官。得以安意招徠。設法補助。而後殘息可延。亂形可弭。災民幸甚。等因。據此。又據南陽府推官程正家呈。據鄧裕南唐等十三州縣合詞。申同前。因該卑職看得宛南一郡。水旱洊仍。口土遞煽。蓋三四年於此矣。田土十不耕五。室廬十不存三。民之死于殺戮。死于饑餓者。不知凡幾也。僅存子遺。復半聚萑苻。半轉溝壑。半離鄉井。道殣相望。流鴻塞郊。百里鞠爲茂草。

四顧了無人煙。他郡亦遭流賊。或偶一焚劫。禍患未酷也。未若南陽之終年盤踞。徧地蹂躪也者。他郡亦支士馬。或暫一經過。荆棘未深也。未若南陽之比歲供輸。到處騷擾也者。至水旱蝗疊。羅斗米錢四百五百。則南陽所獨焉。土寇一時蜂起。姦民倡饑。民爲亂。動及數千數百。亦南陽所獨焉。嚮也。猶可以計分數。今則十分災害矣。嚮也。猶可以別等第。今則徧體瘡痍矣。目擊顛連。悽慘之狀。卽有鄭俠之圖。描畫不出。縱饒賈生之淚。痛哭無門。有司情迫叩關。望恩徒切。司農計窮仰屋。破例維艱。若非軫念湯火。特爲題請。蠲免新舊錢糧。以蘇一方之久困。以收拾十三城之人心。則南陽之爲南陽。有不可知。不忍言者矣。卽議賑貸。亦杯水車薪之說也。卽曰緩徵。亦黃葉止啼之喻也。不如將九年以前一切未完錢糧。概賜豁免。十年縱不可悉蠲。亦冀蠲十之五六。嗟此子遺。庶其更生乎。行見逃徙之氓。尙可復業。不逞之輩。或望歸農。此日減眼前。不可必得之拖欠。爲數無幾。他日省意外。不能終已之金錢。所得更多。卑職等真見有萬萬不可支之勢。非故作危語。以聳聽也。等因。據此。又據開封府推官衛禎固呈。爲灑淚請蠲。以亟救殘黎事。卑職奉委查辦南陽。而所查與往歲異。往歲所清查者錢穀。而今所查。則兵火也。往歲所點查者諸役。而今所查。則窶子也。往歲所巡查者。四野禾黍。而今所查。則滿路荆棘也。往歲所稽查者。城頭丁壯。而今歲所查。壕底肉屍也。歷一邑。嘔數斗之血。見一民。滴滿目之淚。一時鵠形鬼樣之父老。擁馬前而號泣。與二三藍縷之窮衿。伏明倫堂而悲愴者。慘不忍言。其請蠲之文滿案。告賑之紙盈庭。卑職亦安能一一爲之控陳哉。故採各邑之情狀。而繪之圖。其在葉縣北界中。猶有數畝耕耘地。三四往來人耳。西北地瘠無

人不必言。東南兩面爲裕舞土寇搜掠一空。且相率入夥矣。前院多方區畫之牛種。俱付之不可知。縱有強明吏。將奈何。是可哀也。其在舞陽。一望荒草迷人。路徑茅塞。所歷村落。輾轆聲斷。萬竈煙息。至求一人蹤鳥跡。而不可得。城南謝家莊。見來迎者。一地方。一鄉約。便詫以爲異事。詢之。則曰。日站莊頭。夜奔城中。不日亦將散去。而東北一帶。又盡爲賊藪。城內居民。一日數十驚。非署官多方彈壓。不知作何狀也。是可哀也。其在裕州。北行六十里。不見一居民。問之行路客。皆言每夜土寇劫掠。間有鄉居者。皆剝衣凍死。奪食餓死矣。焉得有人哉。至州治光景寥落。卑職居兩日。纔得一餐。臨行求一夫一馬。而不可得。非官之慢地之窮也。是可哀也。唐泌兩邑。昔年經過。已嗟不堪。今且慘甚矣。泌陽東接申確。山多人稀。土寇盤聚而不懈。所謂東十七營。西十七營。豈虛傳哉。唐邑寇稍戢。而百姓十室九空。勢不能束手待斃。意猶耿耿。思動也。是可哀也。南召密邇府城。光景應稍別。而慘苦較他邑尤甚。其青磷徧野。白骨堆積。不煩贅矣。指其可據者。以道官經臨。苦于無食。署官張持三升米。爲兩家分。其官如此。其民可知。雖日爲之恤死亡。招流移。而涓滴之水。無救燎原。是可哀也。南陽府治在焉。地當九省之通。宜何如繁衍。然亦近城十里。略見耕耘。而十里之外。亦與他邑等。以縣令之明爽。東支西吾。僅撐得一僵形耳。後將不繼也。是可哀也。新野當子午之衝。既苦盜。又苦兵。其民將疲于奔命而死。荒旱頻仍。四野蕭條。卽賢令不能挽回也。是可哀也。桐柏去府爲最遠。地索疲。兵火之餘。又添一番悽慘。兩院或遙聞其苦。而未目擊其詳。窮民將誰告哉。是可哀也。鄧州素號沃壤。卑職入境。見村落中。人蹤散亂。幸以爲差強人意。至州治。而官哭士號。各各告窮。時

猶在疑信間。及閱城。而壕內壕外。伏屍徧積。以壯兒肉。付饑犬餐。卑職滴淚不能止。亟責地方以掩埋。而地方言。日日如此。實掩埋不及耳。一時街頭乞兒擁馬前者。近百人。皆口不能言。卑職量出幾錢。以分給。然亦救一日之生。二三日後。又爲伏屍之續矣。是可哀也。鎮平之苦。與鄧等。道路中。白骨森森。遠邇求一禾苗不可得。民將盡死於春首矣。是可哀也。內浙兩邑。僻處萬山。南接荆襄。西連商雒。北控伊魯。爲盜賊出沒者。且七年矣。徧查村落。求一椽片瓦而不可得。兩邑令各欲爲百姓請命。且欲爲百姓死而不願生。而內令之嘔血。又卑職親見者。賢宰之苦。分固應爾。如無濟時事。何是可哀也。卑職口有盡而情無窮。據目之所擊。僅繪其千萬中之一二耳。所幸者。諸城內城關。尙有寥寥數人。引頸求活。然耘耔不敢及城外。則無食貿易不敢走四方。則無衣。不久亦將死。而國賦告急。猶時見官比吏呼。而不敢止也。僅存之餘。一苦於衣食。再苦於催科。則死且速。嗟乎。死亡中之留遺。曾幾何而役之守城。役之禦寇。役之備供應。役之供鞭朴。勢不盡驅爲綠林黨。溝中瘠不止也。人言救荒無奇策。今且救死無善著矣。意惟寬賦息徵。以稍緩須臾之死乎。懇乞亟題請蠲。將新舊錢穀。一概告罷。以救此一方民。聖天子明見萬里。方發三萬金。遣官行賑。豈惜數萬賦。亟不蠲擲宛南一塊土哉。事急矣。速之旦暮。或可存一。二子遺。緩之須臾。則南陽不可問矣。卽有腸熱如鄭俠者。何處尋流民而圖之。卑職非宛吏。而言宛事。似乎越俎。然以情切剝膚。禍急燃眉。不得不灑淚呈請等情。據此。又據分守汝南道。按察使。兼右參議周以典呈。據鄧裕等州縣申請蠲恤緣由。本道看得南陽一府。年歲之荒歉。流寇之蹂躪。與夫人民之流亡。較之他郡。更甚且慘焉。曷言乎。

年歲之荒歉也。夫南陽自六年冬之無雪。七年春之無雨。二麥不登。民已失望。至八年夏秋相接。水旱頻仍。益以蝗蝻作祟。咀齧殆盡。民不聊生者。十之六七。惟九年春作方輿。禾黍稍種。咸意更生。有日不期。夏秋以來。霖雨如注。禾稼朽爛。漂沒無存。間存十一於千百。祇供盜糧。重以瘟疫時行。耕牛損壞。布種已失。生全何望。今冬已難支持。來春作何景象。時事尙可爲哉。卽所稱素封之家。能堪此屢年摧殘乎。曷言乎流寇之蹂踐也。夫南陽實爲咽喉之區。賊或自陝而走楚。或自楚而入陝。或走江北。或走汴梁。靡不以南陽爲出沒孔道。且環宛屬皆山也。依山傍谷。自是賊之故址。由七年冬。流寇入豫。卽擾南陽。盤踞之處。動踰旬朔。卽九年正月。賊入內淅。負嶠莫撓。半年於茲。夏間避暑。坐食山中。每以數萬騎出而打糧。田間禾麥。一過舉無遺粒。毒殺老幼。暴屍橫野。焚燬廬舍。虐焰蔽空。卽間有敗屋數椽。僉皆荆棘滿地。村落斷絕。行數十里。而不見隻影者有之。目擊真可寒心。卽素號輻輳之鄉。能禁此賊之荼毒乎。夫以荒歉之流行。兵寇之雜遝。剝削日甚。柴米日踊。鶉衣鳩面之輩。俯仰無以自給。旦夕莫必其命。卽間有一二贏餘者。涓滴之藏。不堪以實羣兇之腹。究竟貧者固貧。富者亦貧。或情不得已。易去其鄉。或計無復之。甘心從賊。環宛屬無地非賊。無人非賊。職此故也。彼老幼不能匍匐以行乞。止有委命溝壑已耳。迄今村竈無煙。道殣相望。哭聲晝號。餓鬼夜嘯。聞之。眞可涕零。夫南陽素號瘠國。當彼年豐時。平錢糧猶有逋負之歎。值此皮肉罄盡。瘡痍難起之候。將餬口之不給。甯復有筋力。以供輸納。況七八九年之荒凶。日甚一日。則七八九年之逋負。欠而益欠。卽今年又將盡矣。卽有司之參罰。固責不容辭。將靡有之子遺。肉其勝剝乎。爲今

之計在大施蠲免以紓物力爲救災恤患第一義。皇上春發帑金三萬。特差內使督賑。不尙厯容慮乎。此時流民之圖。猶在御前。懇乞軫念南陽。特疏單題。得蒙蠲免之令。以紓目前之急。安知聖上加惠南陽。不視上春尤加摯乎。此職之妄覲。皇仁於萬一。而急欲陳乞。不憚煩聒。以瀆憲聽也。等因。到臣。看得水旱盜賊之災。雒汝歸開皆有之。而南獨甚。故臣自受事以來。各屬申報災傷之文。幾無虛日。臣姑置他府申文。而專報南陽一府。亦不備述道府州縣申報之情狀。而專舉臣往來目擊之景象。爲皇上陳之。臣見自葉縣至南陽。二百八十里。所過村落。盡付煨燼。頽屋敗垣。漸成工墟。路旁田地。盡皆荒棄。榛蕪荆棘。如同化外。蓋往日之災傷。不過曰民貧。曰地薄。而今且無民矣。無地矣。何謂無民。蓋流寇盤踞之區。逼近此處。各村鎮或搶掠二三十次。甚至四五十次。男婦老幼。有被殺死者。有被擄去者。有懼殺懼擄。而逃避轉徙於遠方者。有不懼殺。不懼擄。而糾聚截劫。遂成土賊者。彼見夫爲良民。則身家之危亡立至。爲盜賊。則不耕而飽食。不織而煖衣。亦何憚而不爲賊也。其有知義理。畏法度。而良心不變。不能遠徙者。但有移居城內一著。而援兵經臨。辦草辦科。不得不出於彼。所云苦兵。甚于苦盜者。此也。故曰無民。蓋鄉野之農民。今無之也。何謂無地。種地須牛具。而牛具爲賊搶矣。再置則再搶。遂至不可復置。又須佃戶。而佃戶爲賊擄矣。再招則再擄。遂至不可復招。須房屋。而房屋爲賊焚矣。再修則再焚。遂至不能復修。以故耕耘播種之事。竟至全廢。而稼穡蓄畜之獲。盡歸烏有矣。故曰無地。蓋行犁之田地。今無之也。臣目覩其景色。不禁墮淚。蓋臣受牧民之任者也。以三百年生息愛養之赤子。而一旦至此。臣復愀然莫以告。亦安用臣爲者。除一

面擒盜安良。設法綏輯外。伏懇聖明。特遣科臣一員。徧履踏勘。儻臣陳說過富。治臣以欺妄之罪。如臣所言不虛。非大破常格。獨除拯救。則入春以後。將必有不可爲。不可言者矣。臣因是而又有請焉。當此時勢孔棘之際。一州得人。則救一州。一縣得人。則救一縣。如葉縣南陽。皆表表可見。而兩邑之殘喘。賴以少延。顧艱危之地。偏多闕茸之官。蓋有修明職業之才。自有營求善地之力。而無計以脫此地者。卽無智以能此官者也。更祈敕下該部。遇殘破州縣缺出。將近日各衙門所保舉堪任州縣者。坐名銓補。不必掣簽。則爲災地造福非淺矣。謹會同撫治鄖陽。右僉都御史苗祚土。巡按河南。監察御史楊繩武。合詞上請。伏祈聖明照察。崇禎十年正月初六日具題。本月十九日奉聖旨。奏內請蠲事宜。該部看議速覆。以後殘破州縣員缺。卽於保舉堪任內。遴覈銓補。不得以庸劣充數。該衙門知道。戶部覆。看得寇氛狂逞。流毒豫省。被災地方。節經該撫按具題。臣部議覆蠲緩在案。今復據疏稱。該省疊罹兵荒。惟南陽府鄧裕內浙等十三州縣。被災尤甚。而熒黎困苦之情形。地方艱危之景象。真慘不忍言者矣。夫此子遺之熒民。皆皇上供賦之赤子。可不亟爲拯救。以甦此殘喘乎。第該府以十三州縣之多。亦必有被災之輕重。若概請蠲免。則邊情孔急。餉匱難支。臣等實未便遽議蠲免。伏乞敕下該撫按。先將該府屬舊欠新徵。暫准停緩。行查兵荒最甚州縣。分別輕重等第。某應蠲。某應緩。速行造報。以憑覆請聖裁。庶朝廷德意。實暨窮黎。而邊鎮亦不至貽庚癸之憂矣。旣經具題前來。相應具覆。恭候命下。臣部移文該撫按。遵奉施行等因。崇禎十年二月十四日奉聖旨。據奏南陽府屬被災情形。殊可憫念。錢糧舊欠新徵。俱暫准停緩。仍著該撫按。確查兵荒。

最甚州縣。分別輕重等第。酌議蠲緩。作速奏奪。

備陳視賊向往調度機宜疏

題爲仰惕向往之明旨。俯酌調度之機宜。備陳情形。伏懇聖明鑒裁。以圖萬全。以無誤地方事。伏念以臣菲材。謬荷重寄。視賊向往。自屬本等職業。屢厯明旨。敢不倍切冰兢。故在楚。則促臣入楚。在南直。則促臣往南直。在臣。則閱楚告急之文。臣之身。若置湯火之中。恨不一夕抵楚也。閱南直告急之文。臣之心。若負燃眉之急。恨不一夕到南直也。顧諸臣各爲封疆。各自爲算。臣則豫楚。吳。鳳。厥視維均。全局照管。弗容掛漏。以今之賊勢言之。楚中大寇。自應城。雲夢。孝感。黃陂。至麻城者。一股往東。歷商。固。蘄。黃。霍。英。六安。而至舒城。廬江。桐城。安慶之間。又半自東轉。仍棲於蘄。黃。商。城。大山之中。一股往西。復轉入黃陂。孝感。而苗頭。西向。應山。隨。棗。若南。可以復入。應城。京山。若北。可以犯信陽一帶。此賊勢之情形也。臣於西股在楚之賊。則檄監軍道臣張大經。督率副將龍在田。遊擊李源。都司許名臣等。所領滇兵九千有餘。追逐撲剿。移會楚撫調度。滇兵悍銳堪戰。大經統馭有法。儘可當一面者。於東股南直之賊。則檄左良玉所領新舊兵六千有餘。繇六安。牟文綬所領兵二千。繇潁州。劉昌祚所領保兵二千。繇壽州。共計在一萬之外。直趨有賊處所。會兵合剿。移會南樞操江。應鳳各撫臣。及備監調度。再益之以本地之兵。似亦可當折禦之用者。臣仍暫駐光州。南以扼蘄。黃。商。城之賊。東以策應鳳。泗之急。西以防信陽。新野。從入之路。兼以剿撫羅息。汝蔡之士寇。如此。則東西南北。四應不匱。脈絡聯貫。聲氣靈通。固恪遵視賊向往之明旨。日夜懷懷。幾經躑

曙而計不得不出於此也。不然，臣駐楚，則臣與楚撫同聚於賊之南，而斬黃商城之賊，北突光汝，入無人之境矣。臣駐南直，則黃孝之賊，或繇隨棗奔宛南，或繇應山奔信陽，則臣遠不及聞，必有鞭不及腹之虞。且目前商城山中之流寇，誰爲扼堵，羅息攻城之士寇，誰爲制伏，而況近日商雒有闖入之賊，盧氏有攻城之報，將竟相隔於千里之外矣。臣之初駐光州也，竊計三五日後，不入楚，則往南直，乃今酌狡寇之情形，權地勢之遠近，不得不分布兵將於各地，握機運籌於適中，然賊勢飄忽，變易無恆，儻數日之間，再有變局，臣又再酌進止，未嘗拘拘於一定也。伏祈聖明鑒裁施行，臣無任悚懼待命之至。崇禎十年二月初六日具題。十月二十一日奉聖旨，奏內調度機宜，知道了。楚豫自當兼顧，近報流氛，盡突江北，還著確偵情形，視賊所急，星馳援剿，速圖蕩掃，至軍機呼吸，原不中制，不必預請，兵部知道。

因病請告并請分設理撫疏

奏爲剿寇事務殷重，微臣衰病難支，謹據實控陳，懇祈天恩，俯允罷斥，速議分代，以無誤封疆事。伏念臣行能譾薄，材質平庸，本非濟世之具，數年以來，陞伏草野，謝卻世緣，一意調攝，僅延喘殘，乃于去歲八月，忽蒙特恩起用，維時口在近郊，正臣子憤不顧身之日，誼不敢辭，及趨至京，纔兩旬，而有今官之命，夫理撫兼在此，皇上非常之恩也，蕩平五省，又今日最難之事也，臣一言病，則負知遇之隆，而啓諉謝之竇，臣誼之所不敢出也，故臣于拜命之初，惟矢捐軀圖報之志，期于盡心竭力而已矣，惟是時勢艱窘，簿書蟬雜，晝夜拮据，無敢偷安，而不自意衰病之軀，不耐煩勞憂愁之叢集矣，始而胸膈疼痛如刺，兩背沈重如

負。猶自勉強撐持。漸積至今。則眩暈怔忡。兩目昏花。神思炫惑。飲食日減。便溺皆血。且將有性命之憂。夫臣之一身。所關者小。而臣一身所任之事。所關甚大。臣安敢不據實以陳也。古人三月報政。臣受事三月。餘亦既智盡能索。神疲精憊矣。而土寇之甯靜無期。流寇之披猖如故。臣安得不病。況臣所服者。兩人之官也。臣所辦者。兩官之事也。前此兩臣皆春秋比臣爲富。而才猷品望。十倍于臣。然猶分任之而不足。豈臣能兼任之而有餘乎。假令當年兩臣在事。一日而各有半日之閑。則臣今盡日而無片晷之暇矣。如各亦盡日之力。則臣當一日而辦兩日之事矣。一日辦兩日之事。或偶一爲之則可。若經月歷時。臣身非金石。安能不病。顧此何時也。理撫何官也。而可以兼任之。有如點簡未到。籌算未周。卽治臣以罪。亦何救于事。伏祈皇上俯鑒臣病非託。臣情甚真。將臣罷斥。爲不能仰副委任者之戒。卽敕部速議。分設二官。早來交代。庶于勦務無誤。于封疆有幸矣。臣草疏畢。見邸報。科臣鍾斗寇氛已薄。江干一疏。末段亦有急爲更置之議。臣深服其持論之當。而更感其洞燭之悉也。無任悚懼待命之至。崇禎十年三月初四日具奏。本月二十一日奉聖旨。理撫重寄。勦寇方殷。王家楨著殫心調度。速奏蕩平。以副委任。不必因人言輒有引請。該部知道。

盧氏漕米已徵改蠲疏

題爲殘邑逋漕。設處已完。復奉旨蠲免。代爲題請。移免見年漕額。以昭皇仁事。崇禎十年四月二十二日。據河南督理糧儲道副使程楷呈。本年三月二十三日。蒙戶部劄付。雲南清吏司案呈。奉本部送。據河南

督糧道程副使呈前事等因到部奉批司查奉此查得盧氏縣屢遭寇變官死民逃崇禎八年分漕糧四千二百餘石無從徵解業奉兪旨蠲免一半餘作五年帶完今該道呈稱先已措處完解具見急公之誼至于措完之糧而欲改作十年分之數必該地方撫按據實題請本部方便議覆仍劄該道酌行可也等因呈堂奉批速劄奉此案呈到部擬合就行爲此合劄該道照劄事理即便遵照施行等因蒙此竊照盧氏縣八年未完漕糧四千二百之類本道因部覆森嚴不敢觀望不敢推計多方設處已全完于未奉恩旨之前今得蒙浩蕩皇仁恩免一半餘作五年帶完則將本道湊完之數請改爲十年漕額而八年分仍遵恩旨一半蠲免一半帶完庶如天之仁得實旣于災黎惟望兩院早爲地方題請本部議覆有據斯殘邑子遺之福矣等因具呈到臣該臣會同巡按河南監察御史楊繩武看得盧氏一縣每歲額該漕糧四千二百餘石崇禎八年爲流寇蹂躪官死民逃欲責其徵輸則勢必不能矣督糧道臣程楷惕于功令之嚴不敢怠忽漕務百計措處業代爲之全完嗣後得邀皇仁免其一半餘以五年帶完垂憐殘邑之苦恩綦渥矣惟是道臣所湊完者乃在恩旨未頒之先茲該道欲將代完之數乞改爲十年之額正所以廣皇上浩蕩之恩于殘黎耳既經該道具呈前來相應具題伏祈敕下戶部議覆施行崇禎十年四月二十五日具題閏四月初十日奉聖旨戶部知道戶部覆看得盧氏縣連遭寇變官死民逃八年分未完漕糧四千二百餘石奉有蠲免一半餘作五年帶完兪旨今撫按題稱糧道程楷留意漕糧業于未奉旨前代民措完逋數又念皇恩浩蕩祈移免該縣十年見徵此其意實爲拯救災黎宜從所請以彰寬恤等因具題

崇禎十年閏四月十八日奉聖旨。這盧氏八年分漕糧。既經完解。所蠲分數。准移免十年見徵。以彰寬恤。因病請告再懇。允放疏。

奏爲微臣衰病情真。封疆不堪久誤。謹瀝誠再懇天恩。俯允回籍。別選賢能以早奏蕩平事。竊惟流氛孔熾。幾數十年矣。以數十年未結之局。而欲了當於一朝。此必非常之人。方可成此非常之業。乃譾劣如臣。謬膺是寄。皇上所以寵任臣者。專而且隆矣。臣所以夙夜拮据。感恩圖報者。亦智盡能索。心力殫竭。而無餘矣。此自在中外耳目中。非可容臣飾說者。惟是分量有涯。而容受因之。年力有限。而伎倆因之。臣蒲柳之質。今年六十有一歲。衰病侵尋。日甚一日。春暮以來。眼花耳鳴。右體麻木。將成不仁之症。幾有性命之憂。五官不靈。一籌奚展。以此而欲冀成掃蕩之功。難矣。夫抱經濟之略。而憚拯救之勞。臣誼之所不出也。無裨動勦之實。而徒戀爵秩之榮。尤聖朝之所不容也。伏祈皇上俯察臣病。是真督剿事重。允臣回籍。別選年力精壯。韜略素裕者。以充是任。則蕩平之功。可計日而成也。至於中樞條議。鄖撫兼理。臣居恆每有是言。其見正與臣合。卽如賊今盤踞楚豫之界。隨賊向往。臣宜移鎮南陽。乃省城當賊經過之後。民情惶惑。風鶴成驚。昨十五日之夕。忽城東男婦扶攜歸城。至次早。城西亦然。臣親出郊外撫慰之。始定。及偵探四出。毫無聞見。蓋兵荒之後。地亦人窮。訛傳思亂。重地可虞。臣卽欲離省城。不能也。生靈在湯火之中。安危判呼吸之際。伏祈廟堂早裁決一日。則五省早獲一日之安矣。臣無任悚懼待命之至。崇禎十年四月十九日具奏。閏四月初四日奉聖旨。流氛督剿方殷。王家楨著一面殫力料理。不得引請弛卸。該部知道。

三次請告疏

奏爲臣病益篤。臣去當決。三懇天恩。俯容休致。以免誤封疆事。爲照臣曾兩次具疏乞身。未蒙聖慈允放。軍務倥偬。臣不敢不力疾料理。然病因勞而漸深。事因病而漸誤。至於事誤而病愈加矣。目今兩眼昏花。對人不辯面孔。下部酸軟。升降每至傾跌。眩暈健忘。落筆成訛。種種病症。皆心血虛耗。精力衰弱所致。臣平昔多病。醫藥罔效。須閉戶靜坐。始可調攝。今干戈擾攘之際。晝夜拮据。猶恐時日不給。安有靜坐之時乎。臣之一身。不暇過慮。獨是巡撫何官。中州何地。今日何時。而可容一病夫任之。目前募兵措餉。買馬製器。選將練兵。事務殷繁。卽精明強幹者。尙恐思慮有所不到。計畫有所不周。臣若不亟爲控陳。將竟成叢脞。而釀禍于中州不淺矣。臣受國厚恩。捐糜圖報。本所自矢。無奈福過災生。力不從心。何也。伏祈皇上憐臣病真。情非假託。俯念中州重地。不可久誤。容臣休致回籍。速推賢能。早來交代。臣狗馬餘生。尙未卽填溝壑。惟日與白叟黃童。祝聖壽于無疆而已矣。臣無任惶悚待命之至。崇禎十年五月初十日具奏。本月二十日奉聖旨。王家楨剿寇方殷。豈引病弛擔之日。況總理未經交代。亟資調度。應援著遵旨殫心料理。力圖蕩掃。如或疎誤。責有所歸。該部知道。

留左鎮在豫協剿疏

題爲汝南寇氛孔熾。大將遠調非宜。謹據實直陳。懇祈聖明。俯鑒允留。以保殘疆事。爲照江北係陵漕重地。一遇警急。齊聲呼籲。中外震驚。不能不厯聖慮之焦勞。此理勢所必然者。故臣一聞報。卽發標下官兵。

汪雲鳳等三千餘名。令聽用都司吳宣猷督押前行。沿途催餉。於閏四月二十一日。自南陽起程。據報於五月初十日到太和。計此時已抵皖矣。彼中在事諸臣。猶亟以左良玉爲請。部議調發。奉有明旨。蓋江北諸臣。止見目前之急。而未知豫中之危。部議允調時。亦止知有浙川解圍之報。而尙未見浙川陷城之報也。卽知陷城。猶未知楚中之賊。自南奔豫。江北之賊。復自東轉豫。而光羅商固信息等處。危在旦夕也。目今羅岱以中箭病臥。其兵暫付孔道興統領。駐防內鄉。又分兵壹千。令中軍車登科。剿伊陽之賊。蓋伊陽山中有瓦背餘孽。與土寇構連劫截。致令嵩伊盧汝之間。苦無甯宇。農事盡廢。此車登科之遣。亦必不容已。而千人尙存乎見少也。破浙之賊。潛伏鄖西山中者。耽耽思逞。除先調去川黔兵三千。止剩左良玉三千。合之孔道興兵。併羅岱原兵。貳千。纔共計五千。分佈於寥闊。遠之山城。以支撐數萬之強寇。尙不免顧此失彼。今一旦撤去三千勁卒。而止留二千。則狡寇乘虛窺逞。勢所必至。試思左良玉督率八千之衆。協力堵防。尙有浙川之失。若良玉去。頓減兵六千。能保地方之無恙乎。此良玉之不可動移也。不待智者而知之。至於信陽山。中原有西來賊叛。出沒其中。陳永福兵三千。僅僅貼防。未足交鋒。今復加之以楚中大寇。盡數入豫。與叛兵合矣。據安池道稟稱。賊之在皖者。約有十五六萬。前月有五六萬。過英山羅田。向光固商城去矣。是三大股大賊。合之不下二十萬目。今光羅商固被賊圍困。塘報斷絕。而陳永福三千之衆。安能支持。是左良玉一旅。以之救豫中。猶不暇給。竟舍目前之急。而遠赴賊未必尙留之處。似非計之得也。又據監軍道戴東旻稟內稱。頃有役自安慶至。係閏四月二十八日來者。云此時皖城已無賊。皖賊盡

奔光山信羅間。該道職掌相關。必有確據。蓋賊勢飄忽靡定。今日之調在豫爲賊來兵去。在皖爲賊去兵來矣。無濟於皖。徒害於豫。此一時在豫同事諸臣。願留左良玉者。無不有同心也。惟是懷惕明旨。不敢少遲。臣移駐許州。催左良玉帶領兵馬。於二十一日到許。二十四日四鼓發行矣。臣面教以途中遠偵確探。如賊在光固。直馳光固。移會陳永福。先殲光固之賊。隨賊剿殺。如賊復東去。江北事急。便赴江北。務期與賊對壘。勿拘泥文移。向無賊之處。徒疲兵力。擾道路也。但良玉一東。鄖西之賊。定然出山復逞。宛南各州縣所在寒心。而光羅一帶。今方危如壘卵。更令臣食不下咽。寢不成寐者也。同是皇上之封疆。同是皇上之赤子。夫豈有異視焉。罪在臣病篤昏憤。不敢遽請留也。伏祈皇上垂念腹心之地。賊多兵寡。勢在危急之際。仍留左良玉在豫辦賊。免赴江北。則殘疆可望保全。卽如今春豫中無賊。臣不難傾豫中之兵。盡發江北。臣何敢有畛域之見。更祈聖明垂鑒焉。再照日前兵部條議。總理兵三萬。豫撫兵壹萬五千。以左良玉一旅分隸總理。臣查總理未設之先。良玉已奉有援豫專敕。本將防豫前後六載。地利旣悉。風土人情。更稱最宜。總理之兵。將無處不可徵調。以湊前數。留此一枝。專爲中原綱繆計。卽總理之剿蕩。亦未始不資其力。再祈聖明敕部。覆議施行。臣無任惶懼待命之至。崇禎十年五月二十六日具題。六月初八日奉聖旨。該部看議。速覆。

四次請告疏

奏爲四懇天恩。亟罷病臣。以重剿務事。臣於五月初十日具奏。爲臣病益篤。臣去當決。三懇天恩。俯容休

致。以免誤封疆事。奉聖旨。王家楨剿寇方殷。豈引病弛擔之日。況總理未經交代。亟資調度。應援著遵旨。殫心料理。力圖蕩掃。如或疎誤。責有所歸。該部知道。欽此。臣一見邸報。恭設香案於公署。望闕叩頭謝恩。訖。臣不勝感激。益不勝憂懼。伏念皇上以聖明之主。建中興之業。凡挾一材。抱一智者。誰不自慶。遭逢。思乘機遘會。以期樹立於清時。況臣受四朝豢養之恩。蒙皇上委任之隆。方自矢捐糜。不足爲報。何敢萌弛卸之念。緣臣賦質孱弱。不堪重寄。數月積勞。遂至委頓。臣所以冒昧連牘控陳者。正爲剿務方殷。非病臣所可擔任。新總理熊文燦。業已專官敦促。料交代之期。只在此月之內。目今理撫事務。臣雖力疾料理。而承聽之下。見臣病息懨懨。窺臣在事難久。已視爲五日京兆矣。人情向背。不可轉移。若早另推補。俾之耳目變易。號令更新。與今日之疑貳觀望者。取效自相逕庭也。天語煌煌。固已洞鑒臣之或有疎誤矣。臣以庸材負鉅任。夙夜皇皇。何敢自蹈疎誤。顧臣之不疎誤。不獨自勉而已。要以文武將吏之各不疎誤。相與共成臣之不疎誤。彼見臣之支離。日甚一日。遂至精神渙散。訛傳時興。復欲其同心協力。立奏掃蕩之功。實有倍覺其難者。若待臣疎誤昭彰。罪狀顯著。卽置臣於法。而封疆之事。殊費收拾矣。不如速放臣去。臣旣倖而生全。地方早見廓清。則臣之所冀倖者小。而地方之所獲全者大也。伏祈皇上鑒臣病苦情真。萬難供職。去留遲速之間。關利害安危之重。准臣罷去。速行另推。庶全豫封疆。奠安有期。而臣之狗馬餘生。悉屬皇恩之再造矣。臣無任悚懼待命之至。崇禎十年六月初二日具奏。本月十五日奉聖旨。寇氛未靖。大剿正殷。王家楨著殫力實圖掃蕩。不得以總理交代有期。引病弛卸。該部知道。

請催援兵并陳合營規則疏

題爲援兵赴豫太緩分營將領太多伏乞明旨嚴催并陳合營規則以整行伍以圖蕩剿事爲照豫中援兵議調王忠之三千牟文綬之二千董用文之二千蓋廟堂真見豫中情形寇多兵少故爲是萬不得已之計臣亦仰體此意不敢請增王忠等若從國家起見亦宜振旅而前猶恐後期矣孰意其不然也臣一受事卽遣官檄催牟文綬矣乃以山東藩司未發月餉報臣隨付去一檄催山東藩司速發至今猶未見到也臣遣官守催王忠以起程牌到驛該驛抄報臣又遣官沿途申飭預備糧料及禁約騷擾至今猶未見到也臣屢檄催董用文近部議河冰未合應令渡河奉旨保兵協剿防河事宜著該理鎮視賊勢緩急酌行是用文不但防河亦有協剿之責至今亦未見到也豈其明旨赫赫尙不足畏與不然何悠悠忽忽怠緩至此極也若左良玉陳永福孔道興江樞羅岱楊從義朱文進大小七將官非分領各營見今與賊對敵者耶臣一受事知宛南賊勢猖獗卽委監軍兩道臣戴東旻張大經督領七將官合兵赴宛殲剿乃左良玉以告病揭帖至轉委中軍張應元領兵以往止見過汝州有左兵搶草傷官之報而未聞與賊交鋒也楊從義朱文進止見過葉縣兵與毛兵爭槽被殺傷之報而未聞與賊交鋒也孔道興聞前此中矢穿膝而未聞與賊交鋒也羅岱面對臣言賊不難殺只是將不一心而僅有七里河三十六級之報陳永福有水河一百六十三級之報江樞有九十五級之報又同有周家營生擒七名斬級九顆之報而臣未敢信無殺良駁道嚴覈尙未確回也顧惟是斬獲之報在十二日而博望掠去舞陽知縣吳應祝之報在


十一日。雖賊中聞係縣官。隨即放還。然而相隔一日。相去二三十里。全無哨探。竟不救援。任賊享賽。若罔聞知。則所稱當陣斬獲。安能必一一皆真賊耶。此七將官者。豈調度機宜未當。催督檄文未嚴。與抑豈向來伎倆已慣。點綴便可報功。與不然。何躲躲閃閃。疎玩至此極也。蓋兵分則勢渙。將多則指亂。臣請去其五將。合爲三營。左良玉大將也。初多捷功。近似自厭。當以羅岱之兵合之。蓋羅岱既革職銜。宜歸臣標下。聽發衝鋒。爲圖功自贖之地。左良玉統此五千之兵。往來嵩雒之間。北阻窺河。西扼關陝。南勦登汝盤踞之寇。儼然有虎豹當關之勢焉。陳永福。孔道興。江樞三營。合爲一營。止留陳永福一將官。領此五千之兵。往來宛汝之間。堵其北渡。絕其東馳。南助荆楚之聲援。儼然有率然在山之勢焉。蓋陳永福曾負敢戰之名。而孔道興宜令休養。江樞領兵。原係暫管者也。楊從義。朱文進所領川兵。俟牟文綬到日。歸牟文綬統之。合爲一營。此五千兵。往來禹汴之間。屬臣標下。以便聞急徵發。儼然有居重馭輕之勢焉。仍同王忠。董用文。左良玉。陳永福。三股入山搜剿。兩股設伏堵殺。務淨掃妖氛而止。但得流寇一靖。將土寇自息。豫寇既平。可全力注楚。此臣區區一念朴誠。從實地做起。庶幾可望有效。不然。臣徒手奔走。轉抄塘報。可以欺人。不可自欺。更不敢欺身上。懇祈嚴敕王忠等。星速赴豫。到日。嚴整紀律。無如往日之縱軍搶掠。敕左良玉。速出督兵合勦。保全平昔威名。其陳永福以下。再如前逗遛觀望。殺良冒功。騷擾土民。容臣重則斬首。輕則細打。立刻正法。務將從前肺腸。一洗而新之。至楊從義等。俱革去領兵。在臣標下。聽有警調發。臣此番會剿之舉。雖驅逐入山。宛南一時無寇。與楚寇聲氣。使不得通。然而糧料之費。所過稱苦。斬獲之報。於

賊無損。臣心大有憾于將官太多。彼此觀望。未遂臣之初意也。伏望聖明鑒察焉。崇禎九年十一月二十八日具題。十二月初九日奉聖旨。王忠等兵已敕部飛檄嚴催。仍著申明紀律。星馳前赴協剿。如再逗延。參來重處。并左良玉不許託疾規避。其合營責成事宜。卽如議飭行。朝廷但課成功。一切調度。並不中制。將領有觀望怯玩。殺良冒功等情。參遊以下。卽以軍法從事。餘俱已有旨了。該部知道。

五次請告疏

奏爲病臣義不可留。罪在必逐。五懇天恩。亟賜罷斥。別簡賢能。以肩重任事。該臣於六月初二日具奏。爲四懇天恩。亟罷病臣。以重剿務事。奉聖旨。寇氛未靖。大剿正殷。王家楨著殫力實圖蕩掃。不得以總理交代有期。引病弛卸。該部知道。欽此。臣恭設香案。望闕叩頭謝恩。訖伏念臣家楨淺衷寡謀。力不勝任。猥蒙天語惓惓。責之以殫力。望之以蕩掃。凡爲臣子者。自非有胸無心。能不矢捐糜以圖報效。顧惟是用舍予奪者。朝廷馭世之大權。進退遲速者。臣子居身之大節。權以斷而歸於當。節以審而成其決。則臣區區犬馬戀主之心。真有欲少遷延。而不可得者。蓋揆之皇上委用之初意。而惶懼無以自容也。臣叨冒卿貳。例不推巡撫。拜命之初。意重在理。乃數月之拮据。茫無成效。流氛之猖熾。愈見蔓延。則臣罪之宜罷也。當不再計而決矣。若以理見推。而以撫居官。則節鉞之重。祇爲匿短之責。臣清夜自思。愧懼交集。何能靦顏以強居也。且督撫體統稍異。臣領敕書內。載以總理體統而行。今旣專撫。則禮節之間。仍舊旣見以爲乖方。更易又殊覺其倒置。此衣冠瞻視。關係地方者。頗重。不宜以臣繫戀一官之私。致有褻越者也。況自臣受

事以來。人言屢及。若笑罵繇人。而好官自我。則頑鈍無恥。何以臨吏民之上。恐三軍之士。且心輕之。而欲其法令之整肅也難矣。有此三者。卽精明強幹。亦難適於用。而況臣之病勢日沈。形神俱憊。心血久枯。肝氣虛損。而膽力因以衰弱。晝夜兢懼。若有禍害之至。前轉瞬遺忘。安覩制勝之遠略。卽如近日。臣自汝甯赴省。方及許。而又往南陽。方駐南陽。而確汝蔡西。賊復闖入矣。內浙鎮鄧。危如累卵。開歸空虛。震動可虞。兵寡路遙。徵調不至。臣病息淹淹。無能淨掃狂氛。以副聖明之倚任。而商城告急。靈陝告急。竟付之不可知之天。至募練一事。急如燃眉。亦但以文移催之數百里之外。不能一至省會。親爲訓練。則前此之耽閣不少。後此之叢脞更多。臣之千罪萬罪。無可爲贖。而封疆之一誤再誤。何堪嘗誤。伏懇皇上。軫念中原重地。將臣卽日罷斥。別推才望。來充是任。則兩河生靈有依。而微臣一身爲輕矣。臣可任恐懼激切待命之至。爲此謹具奏聞。伏候敕旨。崇禎十年七月二十四日具奏。八月十三日奉聖旨。王家楨奏內事情。該部看議速奏。吏部覆看得河南腹心重地。寇盜四集。聖明特簡兵部左侍郎王。授以總理。專剿五省流寇。其權綦重。而其責任亦未易副也。後有大剿之舉。而以理臣之任。專之熊文燦。則家楨在河南。是有總理之名。而實爲巡撫之官。名實旣不相副。體統又難整肅。誠有如家楨所言者。況本官屢以病請。情亦非假。當新理臣大剿之時。中州重地。留此若進若退之官。恐致誤事。合無准其回籍調理。另推撫臣受事。而以巡撫之官。管巡撫之事。則事權一而責任專。戢甯地方。有攸賴矣。伏候聖明裁奪。崇禎十年八月十六日。吏部尙書田惟嘉等具題。本月十八日奉聖旨。王家楨准回籍調理。員缺速推才望堪任的來用。



王少司馬奏疏卷二

太倉錢糧疏

爲太倉錢糧虛懸逐款須著實地。伏乞嚴敕清查。以杜弊竇。以服人心事。竊惟今日在財用積匱之後。值羽書狎至之時。而以臣之愚昧。代庖部事。又兼攝倉場。以故旦夕拮据。寢食弗甯。每遇簿書到手。加意搜查。忽于五月初七日。管理銀庫主事陳賓盛。王裕心。交代事竣。以交代文冊送部。臣因細查其冊內所載銀數。蓋欲的知其庫藏之虛實。以爲酌劑盈縮之地也。而冊中實在項下。開載銀三十二萬六千三百七十四兩有零。臣一見之。不勝沾沾喜。卽問邊餉司郎中張鵬翀。庫貯如許。何云一空。鵬翀亦不知其所以然。卽促賓盛裕心至衙門。備問之。始言三十餘萬。爲相沿之虛數也。臣謂銀數何能虛懸。始言支放出庫。執結未到。無憑開銷也。臣謂執結何難查取。始言執結出於領銀之人。銀旣到手。執結遂緩不經心也。臣謂未有執結。如何發銀。始言時迫事急。不得不發。而歷年相沿。非一日也。臣于是諭以速取執結開銷。倘執結不到。其中有別弊者。該庫卽據實開報。以憑參處。臣除一面催取執結。仍一面冊送司查。此太倉清查所自始也。越數日。而科臣劉安行有疏參糾。奉旨嚴查矣。夫清查實始自臣。而自萬曆四十五年。以迄於今。經營之年月。支放之卷宗。一查了然。惟有遵旨。同科臣實加磨勘。而何敢再有贅說。以瀆天聽。乃科臣劉安行回奏。復奉有嚴旨。臣又何敢無說而處此。蓋科臣之參。所據者。查取執結之手本也。手本內描

寫光景。言庫無實銀。祇懸虛數。至三十五萬之多。科臣爲國忠肝。一見安得不參。參之誠爲有據。但錢糧須歸實地。而後清查得法。纖悉畢露。卽就手本窮之。亦可見其大概。手本內工科於天啓五年十月支天啓五年秋季俸銀三十一兩一錢。夫至十月而支秋季。至今猶列預支之內。則預支二字之義。亦可見其大概。蓋執結未到。而發銀卽名預支。雖其中甲先支乙。不敢謂其全無。然類工部之俸者實多。今日若不直窮到底。則其作奸弊者。且得借口展辯。臣謂清查之法。自以執結爲主。夫年例則有當日領解之官。俸銀則有各衙門造支之簿。若非實領銀去。誰肯出一執結。執結至。而巡視補掛補銷者。則錢糧懸虛之故。果爲執結不到。無他弊也。執結查取不至。而巡視不准補掛補銷者。則其中情弊。亦自水落石出。而神奸不能遁其形矣。款款稽查。件件著實。而後弊竇可清。紀法可明。科臣有聞必告之初意。微臣見冊卽查之苦心。皆可不負聖主之勵精矣。又科臣劉安行條陳一疏。奉有九卿科道會推精明心計之臣三四員之旨。臣捧誦天綸。夙夜躊躇。乃於代庖文移之間。事體商確之際。司官中得於真知者。列名上聞。練達勤敏。則山東司郎中范鏞。博大宏遠。則福建司主事張元佐。精詳執持。則雲南司郎中楊國柱。此三臣者。皆可備異日大用之選。無難於目前會計之役也。此外不乏表表。而或有專差。或無指實。臣不敢濫及。至於會推別衙門之臣。應屬吏部爲政。臣部難以越俎。伏乞敕下科臣劉安行。併巡視科臣鍾烱。道臣馬如蛟。將前所參太倉虛懸銀三十六萬餘兩。嚴加清查。先取執結。其無執結者。查經管何官。支領何人。著落完追。依律參送。卽著臣衙門司官范鏞等三員。分理會計。其別衙門心計之臣。仍著吏部會推。則錢糧之弊永

絕而清查會計。悉得其當矣。臣無任悚懼待命之至。

軍興裕儲宜亟疏

題爲軍興裕儲宜亟餉額匱乏可虞懇乞聖明速敕計部酌盈虛清耗蠹以濟危疆事專理新餉山東清吏司案呈崇禎元年四月初六日奉本部送戶科抄出督餉省直巡按監察御史劉重慶題前事等因本年四月初一日奉聖旨朕念切封疆發帑已有旨了遼餉原有舊額幫支各色卽著改正稽核兵馬清查耗蠹爲目前急著說得是著該部設法嚴查作速議覆戶兵二部知道欽此欽遵抄出到部送司除舊餉幫支改正另覆稽核兵馬聽兵部酌覆所有清查耗蠹相應摘覆案呈到部看得自有遼事以來眉攢窘乏日議措餉目擊虛冒日議清餉不啻穎禿唇焦而卒未見一措之果足用一清之果覈實也然往歲左支右吾尙可撐持旦暮積至今歲窘乏極矣蓋以黔蜀用兵割餉如許而山東島餉之留南庾事例之留粵東鹽鐵之留誰非新餉額數有定之入額正苦漸削而無定之出更苦漸增姑不敢一一瑣陳以瀆天聽卽以關門論舊歲五月以前原係關內外總發每月止餉一十七萬五千自甯遠另設餉司關內支八萬三千關外支十萬矣臣部月月照數措發未敢有違乃關外于原額十萬之外有加無已自去歲八月至十月多借發過馬乾銀四萬兩作月餉未足也又復請找月餉三萬五千矣自十一月至二月又請找月餉八萬矣且稱從此後每月餉額應須於十萬之外加二萬矣臣部方勉湊於額中該鎮復求多於額外臣部方幸完一月便了一月之局該鎮復且收一分止算一分之找月來索餉之文不曰臣部欠該鎮

月餉一二十萬。則曰該鎮缺兵餉三兩月。聞者皆相顧動色。而不知臣部于正額之餉未常欠。卽該鎮于原額之餉亦未常缺也。增者日增。誰爲止定之期。解者雖解。終無不欠之日。而臣部仰屋持籌。如杞人憂天。精衛填海。亦何濟于緩急之數哉。多多益善。在邊臣自有定畫。臣部何敢越俎而譚。第以月計二萬有零。不見其多。以年計二十五六萬。亦不爲少。臨渴難掘。無米安炊。萬一事有不測。致誤封疆。盡委之于臣部之欠餉也。不幾以額外之增加。而貽臣以莫贖之罪戾哉。督餉台臣。身膺餉務。其於兵食盈縮之數。與夫庫藏虛實之源。業已洞若觀火。且原奉敕書。內稱遼左道將。并聽弔查。則今日之奉旨清查耗蠹。固其職掌也。前臣復鄖陽撫臣梁應澤。疏請察餉者。并察兵。亦奉有俞旨矣。伏乞皇上嚴加申飭。督餉御史。遵照弔查原敕。并臣部原題察餉并察兵事理。會同督撫司道。設法清查。何項當增。何項當減。額定兵數。以爲臣部餉數。仍於事竣之日。照例奏繳舉劾。庶耗蠹自清。兵需自裕。臣部免受欠餉之虛名。榆關永奏飽騰之實效矣。崇禎元年四月二十七日具題。

事例歸還戶部疏

題爲事例歸還臣部。欽承天語傳宣。懇乞敕議畫一之規則。督理之專官。以便開納。以塞弊孔。以重國用。事竊惟積匱而至于今日。蓋勢窮理極。更張變通之會也。自臣代庖以來。臺省連章而陳。聖主焦勞而慮。有不以財用爲第一義者哉。然而舌敝顛禿。終無救于燃眉之急。臣亦嘔血廢寢。終無當於責成之誼。昨于二十七日。召對平臺。蒙皇上簡出臺臣吳玉錢糧三空四盡一疏。科臣黃承昊錢糧蠹耗已甚一疏。命

二臣朗誦傾聽而詳詢之。一時諸臣無不仰窺皇上銳治太平爲足食足兵圖經久宏規矣。已而閣臣體皇上德意。謂臣部缺餉。關繫九邊安危。事例歸還。可濟一時實用。蒙皇上俞允。傳旨今後事例盡歸戶部。于時閣臣稱謝。臣亦致詞叩頭謝訖。蓋事例一項。莫非公家之財。總充公家之用。先年邊疆無事。則借三分以濟大工之急。大工告成。則還本有以解封疆之危。卽工部與臣部亦何敢不以皇上之心爲心。而篤同舟之誼。化畛域之見哉。雖德陵興造。然累朝相承。有一定之常經。歲月少假。更堅久之易施。其餘一切工費。計自可取辦于四司之料價。而無不可徐待于百方之那移也。惟是年來兩部爭開事例之條款。不免混雜奸弊之叢生。殊欠清楚。今旣歸臣部矣。則逐款再加斟酌。督理再加專官。尤所以澄源塞流。而不負宸衷軫念。匱乏之至意也。況臣家楨以左侍郎理邊餉矣。添設右侍郎一員督理錢法矣。而右侍郎一員獨無所事事乎。且事例上納。亦原有承行之司。則堂屬無煩另設。一擬議而自定矣。至于臣部錢糧。絲毫其出自外解。而嚴催外解。惟恃有考成一法。乃考成之後。停陞禁調。實屬吏部爲政。雖銓臣體國公忠。無不同心。倘偶或照管不到。則臣部失其權矣。周以冢宰制國用。漢以丞相領度支。良有深意。此又須煩天語一番申飭。始得法令一番整肅耳。蓋眞循良者。自不以撫字格催科。而置國用於度外。斷非龔黃之選也。伏乞敕下吏工二部官員陞轉。務要照管考成。大工事例。當以奉旨之日停止。仍乞敕下臣部。將年來開納條例。細加斟酌。務期名器慎重而不濫。人情樂趨而不阻。仍將專官董理一切事宜。擬議上請。奉旨施行。則財用充。事權一。而聖主之焦勞。庶可少紓矣。臣無任悚懼待命之至等因。崇禎元年六月三十

日具題。七月初三日奉聖旨是。

事例歸還再疏

題爲事例歸還臣部欽承天語傳宣懇乞敕議畫一之規則督理之專官以便開納以塞弊孔以重國用事崇禎元年七月初七日戶科抄出該臣題前事本年七月初三日奉聖旨是即便酌定條例具奏欽此欽遵抄出到部爲照生財止有此數用之得其當則漸盈立法存乎其人酌之協其宜則可久恭遇皇上洞悉臣部之苦乃於召對之日慨然天語以事例盡歸臣部環侍諸臣靡不服睿照之神宸衷之斷以有用之物力專用之以濟度支之窮真所謂用之得其當也部謹仰遵明旨搜查本部原行事例歷年新舊款項再加尋繹細爲增損務使上無濫於名器下無礙於人情以提綱振目之方釐奸剔弊之法一一開具條議并事例款項書冊進呈御覽斟酌協宜法期可久則臣所爲夙夜黽勉不敢怠遑以報聖恩者耳伏乞皇上詳覽敕下臣部以便申飭遵守一專事權天下事有一番振刷卽有一番振刷之利須得一番振刷之人蓋職專則神無紛營權重則事無旁撓應如臣前疏事例歸併之後董以本部右侍郎分理以山西司郎中蓋事例原屬該司承行今不過以右堂總督之員不另設役不重添事不紛更而振刷有人矣其中不盡事宜聽堂司兩臣多方料理加意搜剔非以嚮爵之陋而褻卿貳之體蓋以理劇之任而分司農之勞也應否給與關防伏祈聖裁一廣歸併工部歸併臣部旣奉明旨矣仍有分行於省直續開於邊方者一以從援納之便一以濟轉運之窮乃省直日日起文轉咨而此項錢糧不見有解部者今後應

令省直止留吏農承差一例。地方上納其餘盡行給文赴部上納。卽吏農承差亦必經繇臣部。各省直將納過吏農承差按季造冊報部。其銀亦按季照數解部。解銀到日方與轉咨。如地方遠近不齊。頂參在先。解銀在後者。以頂參之日准其實歷。異日吏部撥該辦題冠帶上卯。必以臣部咨文爲准。至于邊方本色之例。尤屬弊藪。援納員役。賄營奸弁。一紙收單。餉司卽與給文。臣部卽與轉咨。徒以飽貪弁而濫冠裳。究竟何得束芻顆粟之用哉。此後總宜一切報罷。盡歸臣部者也。伏祈聖裁。一酌南例。南戶部協濟臣部銅本內有事例之十萬兩。乃事例常開。銅本常欠。今且以南庚空匱。議留崇禎元年事例一年矣。今後應令南部止留南監一例。納銀南部者卽入監。不得復改北監。其餘一切事例。自崇禎二年停止。盡歸臣部。而銅本之取足事例者。容臣部另行設處。亦不必再煩南部矣。伏祈聖裁。一停新例。臣部又有新餉司事例。大約如舊例。而名曰東征銀納新庫。今兩部猶且合一。一部豈容分兩。以後此項俱宜停止。盡歸山西司。盡納銀入太倉。以省頭緒之紛亂可也。伏祈聖裁。一清濫觴。事例原權宜濟邊之計。年來漸開漸廣。流於濫觴。如饗序黃堂。盡是生財之地。登壇授鉞。幾開入貲之途。合行清汰。以砥狂瀾。臣取新舊事例。徹底查核。中有干礙國體官常者。盡行刪削。就舊例而斟酌增損之。甯隘勿濫。庶於理財用惜名器。兩不相刺謬也。伏祈聖裁。一革量減。事例有量減之陋。因戶工分行互開寬假之端。工先十減其五。戶因之。工又十減其一。戶亦不得不因之。近於互市之肆。減價招徠。幾成笑柄。不辱國體而褻衣冠乎。今旣歸臣部。則前項陋習。可以不踵。應俱照款開數目。實銀上納。永不許復開量減。以行市道者也。伏祈聖裁。一清假冒。雜流

官員實歷之外。盡是輸贖。宜無別資也。乃有一項恩典名色。或各官門客書役。或白丁營謀囑託。僅得一吏。割竟討各衙門移文。盡以效勞行頭。題授品級冠帶。吏部註冊。卽以恩典係之。此何制也。夫品級冠帶。拜官有日。實歷者累年累月。輸贖者累千累百。方叨一命之無從。乃此輩曾無一日之勞。一金之輸。儼然凌二者而上之。情同假冒。法應汰澄。此非仰藉天語申飭。安有禁止之日。然未題者。宜禁絕于未然。已題者。宜安置於既往。合應責令赴臣部。各照本等職級。如例納銀完日。移咨吏部。方准上卯取選。此亦酌情法之平。而杜假冒之漸也。伏祈聖裁。一重咨序事例紛雜以來。各以神通競圖躡等。而拔先徑選之例。亦無所用之。巧速拙遲。令人徒爲咨歎。今當銓法公明之日。乃尙容傀儡伎倆乎。以後臣部出咨之序。一如納銀之先後。卽徑選拔先。亦各如納銀之先後。吏部收卯出序。亦各如臣部咨序之先後。此亦持平之法。應爾非止以鼓樂趨之人情也。伏祈聖裁。一平執爭。臣遵旨條議間。見署工部事侍郎臣張有疏。內稱宜暫留年餘。俟陵工典禮告竣。聽戶部請併。而科臣張等亦相繼以爲言。雖天語煌煌。告播中外。臣部亦何敢不善凝承。而虛皇上德意耶。請於前奏繳冊內。照戶七工三之數。明註應分工部若干。按季照數分發工部。如工部臣所請。俟陵工典禮告竣而止。則旣可不悖明旨。亦可不失諸臣詳慎之意矣。蓋工部四司料價等項。每年約二百餘萬兩。年來事例有餘。任外解拖欠。今再俟年餘。則考成之法可行。而外解不欠。應用當自裕耳。伏祈聖裁等因。崇禎元年七月十五日具題。十八日奉聖旨。事例著一一如議行。俟陵工典禮告竣。併歸爾部。其分理大臣。收受公所兩部司官。并未盡事宜。著開寫來。便入敕諭。該部知道。

事例歸還三疏

題爲事例歸還臣部。欽承天語傳宣。懇乞敕議畫一之規則。督理之專官。使於開納。以塞弊孔。以重國用。事。崇禎元年七月二十日。戶部抄出該臣題前事。本年七月十八日。奉聖旨。事例著一一如議行。俟陵工典禮告竣。併歸爾部。其分理大臣。收受公所兩部司官。并未盡事宜。著開寫來。便入敕諭。該部知道。欽此。欽遵。抄出到部。臣看得軍國典禮。悉屬重務。而緩急久暫。自有權衡。故事例之歸併臣部也。急封疆也。俟陵工典禮告竣之後也。酌期限也。在工部樂於暫分。在臣亦願姑待。蓋宸斷足快輿情。而睿慮又極周到矣。卽臣前疏平爭執一議。竟照依工臣之疏。給以三分。一年請停。又恐不足取信工臣。以按期奏繳實之。亦以兩部公收。三七分用。不但調劑於多寡之間。實可杜從前趨避之路。絕向後假冒之孔。臣兩部均受其賜矣。謹遵旨將分理大臣。收受公所兩部司官。併未盡事宜。逐款酌定。伏乞聖明。併臣部前疏條議。採入敕諭。其先呈御覽例款。刊咨工部。一體遵奉施行。臣不勝隕越待命之至。一分理大臣。看得事例最易滋弊。大司農不過據司呈堂。移咨各部而已。其中瑣屑之處。精神勢不暇及。應如臣前議。以臣部右侍郎總其事。山西司將出過庫帖。太倉庫將收過銀數。以五日一造送聽。其逐加覆覈。然後十日一冊。咨吏禮兵等部。凡各部題授上卯。取選咨送等項。取正堂咨文。右堂咨冊。比對無差。方據准行。仍十日一冊。咨工部查覈。收納銀數。其按季奏繳。已奉明旨。伏候聖裁。一收受公所。看得戶七工三。屢經詳議。竟成畫餅。以兩部分納分收。兌商發餉。色數不免低昂。人情致生趨避。今查有燕山衛公署一處。議兩部經管官。每逢

五逢十。齊集其處。經收事例銀兩。巡視太倉節慎庫科道官四員。輪流巡視。逢五則兩科臣。逢十則兩道臣。其收過銀兩。當日合算。以七分入太倉庫。以三分入節慎庫。往日低假等弊。不許借口通融。分毫寬假。伏候聖裁。一。兩部司官。看得事例原有經管司分。凡援納員役。赴臣部山西司投文。該司查例。印給庫帖。赴巡視科院掛號。然後赴庫納銀。此舊例也。今既公所收受。其給帖掛號。照常遵行。外收銀之任。應以部臣太倉庫司官。工部節慎庫司官。管收事例銀兩。蓋主之以臣部堂官。自宜承行。以臣部司官收銀。分入兩部銀庫。自應經收。以兩部司官。至如效勞官吏書早。不許濫加一名。則官不擾而法不偏。莫便于此。伏候聖裁。一。未盡事宜。看得事例經臣酌定後。就舊例中。刪者十三。留者十七。批陋似已清汰。今既奉旨。一如議行矣。目前兩部應有同心。無虞掣肘。以後在事諸臣。止許清查。不許增添。其刪去等例。如朦朧復准者。以違制論。倘奸商奸書。營謀兌支。包攬生支節者。以律參送。從重究處。伏候聖裁等因。崇禎元年七月二十一日具題。本月二十四日奉聖旨。這事例四款。并該部前奏。俱依議行。還候敕諭發下。以便遵守。

催正卿速任疏

爲代庖叢脞日甚。正卿簡用得人。伏乞天語。敕諭速任。以彰特恩。以無誤國計事。竊惟司農一官。掌握天下之財賦。提衡九邊之命脈。其表率。則十三司大小五十四差也。其文移。直省司府。邊腹督撫。以及在內大小衙門也。其主持酌劑。則盈虛生耗之數。出入緩急之宜也。蓋其任至重。而其事甚繁。即在優游無事之日。猶必以尙書總理。而以左右侍郎佐之。又特設總督。以管倉場。填設侍郎。以管錢法。蓋屈羣策。集衆

智而後職乃舉耳。況今何等時乎。三空四盡之餘。仰屋而歎。口訂軍譟之報。相迫而來。卽額員不缺其一。猶不免有襟肘之虞。蓋時勢之偶艱。而幹理之不易矣。夫以重若此。以繁若此。以五人肩之。而尙難若此。今竟以付之臣之一身。臣卽夙夜在公。心血盡嘔。尙恐精神疲。耳目亂。而況臣才原中平。力甚綿弱者乎。故自三月初五日。前任尙書郭允厚出京。以至於今。已三月有半矣。而外解杳如呼庚。踵至。實此之因。甚至煩聖主之切責。耗天府之儲蓄。則臣部之廢弛極矣。乃新推尙書畢自嚴。輿望翕然傾服。生節自有妙用。倘得蚤到一日。庶蚤免一日之窘急。沈荷皇上特敕擢用。聖主急需名碩至意。亦旣曉然於中外矣。不俟駕而趨朝。分誼宜然。至於總督倉場李起心。奉命已久。去京甚近。右侍郎李成名。錢法侍郎孫居相。憫時有年。促裝無待。俱望其刻期就道。無戀戀田里爲也。伏乞天語。欽定期限。俾尙書畢自嚴等。各遵前來到任。則共濟時艱。所裨於軍國者大矣。臣無任隕越待命之至。

宿疾馴增疏

爲宿疾馴增。心計日短。伏祈聖鑒。允放。以全餘生。以無誤軍國大計事。該臣於初三日。具疏乞休。初六日。奉聖旨。云。欽此。竊惟臣以草茅賤士。樗櫟凡材。幸而瞻依聖明。感荷知遇。犬馬戀主之忱。豈容自己。惟是人臣事君。要於能致其身。身苟不保。何以自致。臣之病。非一日之病也。兩任澤國。以溼侵熱。蒸焉而病。中於脛膝。三任邊衝。以敵驕軍。饑焉而病。成爲怔忡。丙寅。叨移今官。方謂前有大農。後有司屬。或可以畫諾藏拙。而不意承乏署篆。積置難支。愁腸千結。心枯氣短。目今頭眩目昏。四肢軟憊。延醫診視。謂爲積勞。

憂苦所致。非靜養經年。必有性命之憂。臣聞斯言。戀闕之思。與首丘之念。並結於中。不覺胸益鬱悶。而病益沈重矣。伏乞皇上鑒臣病苦情真。允臣回籍。以就調理。倘一日未填溝壑。猶得與田夫野叟。歌詠太平。而沐戴君恩。與天無極矣。臣下情無任懇切待命之至。

臣病難痊疏

奏爲臣病難痊。臣職難供。三懇天恩。允賜生還。以明止足。優渥事。該臣再疏乞休。於初十日。奉聖旨。邊疆多事。國計方急。王家楨已有旨策勵供職。不准辭。該部知道。欽此。臣惟今之時。何時也。正所謂有道則見。貧賤則恥之時也。況臣以碌碌凡品。蒙皇上忠藎之褒。至再。捐糜圖報。臣之分也。臣之志也。顧人之受鑄於天者。有一定之器量。臣不自意。至於今。而臣之器盈矣。雖欲勉爲承載。不可得矣。臣之積疴。備載前疏。連日以來。益以脾瀉。飲食頓爲減少。步履需人扶掖。臣卽戀戀不肯卽去。尙能爲皇上權出入之衡。佐軍國之計乎。思及於此。臣病益增。臣懼滋大矣。目今尙書畢自嚴已到。又有右侍郎李成名佐之。兩臣才望。勝臣百倍。雖邊疆多事。而籌計不患無人。伏祈皇上俯鑒臣病甚真。臣情甚苦。允臣回籍。則首丘之願。遂進退之節。明從此有生之年。莫非皇恩之賜。臣無任悚懼待命之至。

司官私恨疏

爲司官私恨情真。微臣心事易明。謹再控訴。仰祈聖慈洞鑒事。甯遠管餉郎中王楫。奏臣封貯新餉四十萬。堅不肯發。臣遵旨具疏造冊回奏。訖。正靜聽處分間。忽聞王楫又有疏論臣。臣不知疏中何語。但不得

不具疏自理。伏祈皇上垂聽焉。夫至甯遠之缺餉也。臣何敢謂其不缺。如其不缺。半載以來。皇上之所焦勞。舉朝之所畢智而竭慮者。何事乎。顧缺之事理。亦自明白。其一爲入額之縮至一百二十萬。往年或有別項可以接濟。今搜之以至無可搜。那之以至無可那。而襟肘畢露。瓶罍俱空。此其缺在。始議兵者之未善也。其一爲外解之遲。自遼事之加增。兼大工之搜助。小民之皮骨無餘。司府之庫藏如掃矣。以入覲之往返。致徵解之耽延。故公檄私札。頽幾爲禿。差官遣吏。項背相望。借天語之森嚴。兼責成於撫按。而七月以後。始有源源之象。此其缺在。直省之未能同心應手也。至去歲八月始增之二萬。臣於本年四月二十七日具疏內言。臣部方勉強湊于額中。該鎮復求多於額外。臣部方幸完一月。便了一月之局。該鎮復且收一分。止算一分之找。萬一事有不測。致誤封疆。盡委之臣部之欠餉也。不幾以額外之增加。而貽臣以莫贖之罪戾哉。今不幸言而中矣。積至今。而該鎮所指欠數。找補實居強半。此其缺在。內鎮輕於議增。而該鎮便於因循。難於割斷也。向者插口深入。軍餉無措。皇上以不預備責成矣。臣惕於天語之懷懷。每廛夙夜之遑遑。顧預備之法。不過於發解之間。少爲存留。別無點鐵之術也。乃留新餉數萬。於數日之間。舊餉一至。而卽發甯餉。纔發而變聞矣。卽前此通國之議。莫不謂宣大地近插口勢兇。京師何地。庫藏可爲一空。假如雲谷無事。臣留此何用。而不亟發之甯遠。卽臣留此備插。而此心亦何敢瞬息忘甯遠耶。此臣區區一念。可以告君父。可以質幽獨者也。故曰。臣之心事易明也。乃王楫所深怨積怒於臣者。委在定差一節。蓋甯遠之地。人所避也。先是九江差未出。王楫具呈。求去任尙書郭允厚預註。允厚批不便預註。則允

厚已不允其請矣。王楫借此呈以匿其名。而甯遠議差。開俸列楊應宿爲首。陳賓盛次之。宿與盛皆言俸不應去。而不明言其故。及議九江差。又開俸。而王楫爲首。應宿居二。賓盛居三。劉漢居四。臣批云。俸有俸序。差有差序。蓋甯遠差先出。則首俸爲楫。空運差次出。應屬應宿。管庫差又次出。應屬賓盛。九江差末出。應屬漢也。臣之意。順序旣公。而應宿等皆南產。楫係北人。人地又各相宜。楫一時亦屈於公道。顧置人危地。楫前疏亦自吐之矣。皇上試思。楫非恨臣。何所迫之。而一疏再疏。信口詆謗。不少置也。果實爲缺餉而變也。楫正司餉者也。軍士何不向楫索。而向撫臣索也。鎮臣與餉全無干涉。何以同唇也。通判猶云管餉。而推官何以同唇也。川兵獨饑。而遼兵又不饑耶。楫所駐中右。聞亦有兵。亦不饑耶。楫近日揭中有庫貯數十萬。此時盡發之語。豈甯庫可貯數十萬。而京庫不可貯數十萬耶。且甯城本色尙饒。豈不足救饑耶。近日各衙門傳有甯遠小報。內載亂軍告示。及搜劫銀數。則致亂自有因也。當甯變初聞。臣所懼在封疆。及門開譁定。臣所思在撫臣之性命。乃今撫臣不起矣。而臣尙覘顏班行。非同舟共濟之誼。伏祈皇上罷臣。以慰撫臣於地下。以謝王楫之彈章。倘皇上垂憫臣。四篆拮据。苦勞半載。時勢孔棘。智術短淺。准臣以病回籍。此浩蕩之恩。非所敢望也。臣無任悚懼待命之至。

撫甘請餉疏

題爲二運斷絕日久。士卒脫巾可虞。懇乞聖明。軫念衝邊。敕部速發年例銀兩。以解倒懸。以安軍心事。爲照守邊需軍。養軍需餉。蓋自開疆以來。盡九邊而然矣。顧戰款異局也。遠近異勢也。常變異態。而緩急異

情也。廟堂之上。一洞照而調劑之。斯行伍免庚癸之呼。邊疆無肘襟之困矣。乃今甘鎮何如也。東北銀定。歹成賓妻諸敵。抱積年累世之憤。伺間而思逞。西南古六乞慶三保諸敵。負封豕長蛇之勢。陽順而陰逆。凡此營堡。軍士晝夜哨防。寢不解甲。眠霜臥雪。膚裂指墮。主戰之地。苦楚莫可名狀矣。且一線之路。達於關陝。商賈不至。舟車不通。溝壑相接。磽瘠鹵濕。地鮮可耘之壤。人鮮稼穡之能。月餉而外。無可資生。亦其勢所處者遠也。況自□□搆釁以來。烽火幾無虛日。警報一傳。據鞍出堵。語云。壯士臨陣。不死卽傷。奈何以枵腹當之。夫餉。常數也。戰事之變也。緩于其所常得。而急驅之以應變。是孝子順孫所未肯自致者。而望之無所知識之愚軍。豈不難哉。故以今日之情狀。圖目前之急著。卽士飽馬騰。猶慮不能銷強敵之惡焰。乃見有身無完衣者矣。有鳩形鵠面者矣。有貌同乞丐。弃伍逃亡者矣。近據分巡西甯道副使陳陞呈稱。見在庫銀九千兩。不足一月支放。時值春防。狡寇蠢動。東西設防。行糧料草。將何支應。萬分緊急等因。又據分巡西甯帶管分守道副使陳陞呈稱。涼州庫貯銀。止有四千三百三兩。二月尙該不敷銀六千九十六兩零。以後月餉全無等因。又據肅州兵備道副使吳暉呈稱。見貯銀三千三百兩。每月應放餉銀四千三百六十餘兩。不湊一月給放。各軍嗷嗷待哺。監收官束手無策等因。又據西甯兵備道右參議梁廷棟呈稱。西甯倉庫。並無貯有京民二運餉銀。方今敵勢猖獗。兵馬單匱。饑軍嗷嗷。本道目擊匱乏。束手無策等因。各到臣。臣所屬五道。不數日之間。而告餉之文。四道狎至。莊浪距鎮城更遠。雖尙未有申文。而匱乏景象。固可概見。臣念自受事以來。所爲心血畢嘔。而且夕圖維者。在於禦敵。乃今內弭比外捍尤急。強

敵壓境。饑卒荷戈。臣食能下咽乎。查臣鎮京運。自萬曆四十二年。起至天啓四年止。欠銀五十八萬三千四百有奇。民運。自萬曆四十七年起。至天啓四年止。欠銀七十二萬五千二百有奇。京民合之。共計欠一百三十萬八千六百有奇。天啓五年分京運。則已題未發者。一十三萬二百有奇。民運則守催未解者。一十一萬四百有奇。一年之中。合之。又欠二十四萬六百有奇矣。前此無論。卽本年。二十四萬餘金。豈非各運按日而領。計口而食。歲支一定之額哉。而無奈其遲不卽至。若置之也。值國家多事之際。關門控德之時。臣豈敢忘東事。而見拘一隅。但臣所請者。臣鎮應得之數。非妄覬額外。卽盡數全發。固於關門川黔。毫無干涉也。至于民運。各有司痛癢。不相關。甚且秦越視之。臣差官守催。祇以深其怒。而益其遲耳。曾不思甘鎮羌番雜居。人性犷悍。而輕犯法。倘一旦饑餓迫身。囂然喪其樂生之心。何事不有。將遂至不可言者矣。伏懇聖慈。垂憫河西戰地。遠在天末。萬一卒然事起。拯救不及。邊外住牧密邇。人情洶洶。敕下戶部。速將五年分題。過未發年例銀。照數給發。六年分銀。按季蚤發。無復後時。以前欠銀。待充裕之日。徐爲補發。至於民運一項。除臣屢檄差官守催外。仍乞併敕戶部。嚴行布政司。轉行各府州縣。先將五年分民運銀兩。速行完解。帶徵年分。一併補解。無得仍前怠緩。則士卒有醞釀之感。邊陲無意外之憂矣。臣無任懇祈。激切待命之至。謹題請旨。奉聖旨。戶部知道。

戊辰六月念七日召對平臺記言

上命給事中黃承昊讀所奏疏。至太倉歲入若干。歲出若干。各鎮增餉太多。上召戶部臣家楨跪上。問是

實廢。臣家楨奏前次召對。臣所面奏者。與黃承昊今日所奏。言詞雖異。大意相同。上問何以增他。臣家楨對。祖宗朝出數入數。原自相符。後國家承平日久。積貯充裕。神祖時太倉積至七百餘萬。內帑復不記其數。因而看得財貨太輕。各鎮有事。便以增額來請。廟堂上見得太易。亦就許他。既經增後。遂便成例。年復一年。再不可減。年年有增。漸增漸多。積至今日。俱成額出之數。然而額入仍是舊數。不曾有增。所以入數不敷出數。承昊奏對畢。四閣臣同跪稱。家楨有心計。堪在署戶部事。閣臣復奏。戶部匱乏。關繫九邊安危。事例當歸戶部。上反覆詳問。閣臣亦反覆詳對。上云。今後事例。盡歸戶部。閣臣謝。家楨復奏。臣部匱乏。東那西借。捉襟露肘。致聖主焦勞。臣署事三月。食不下咽。前聖上允閣臣之請。將事例銀兩。盡歸臣部。從此邊餉可以接濟。不至誤事。臣不勝感戴。叩頭謝恩。叩頭者三。起復班。賜茶後。上召戶部。臣家楨跪。上云。前已有旨。褒嘉。今又閣臣薦舉。閣臣傳皇上褒嘉。謝恩。臣家楨奏。臣最不才。蒙天語褒嘉。臣感四朝象養之恩。皇上特達之知。敢不益加勉勵。臣不勝感戴。叩頭謝恩。又叩頭者三。臣家楨又奏。臣見皇上望治之心。甚急。臣將各邊單弱之狀。備陳於皇上之前。天顏甚霽。云。奏來。推御案。若欲前狀。中官向前移案。上止之。扶御案立而傾聽。臣家楨奏。我國家承平二百年後。右文輕武。邊方人進學做秀才。不勝其榮。而指揮千百戶。視之甚輕。上開顏云。秀才不勝其榮。臣家楨對。只是我國家重文之意。因此人皆競於習文。不習武事。而邊方武備。全然廢弛。初間□□亦是小事。只該以本鎮軍馬錢糧。益以京師積貯。便可了事。一時廟堂上小題大做。調動九邊之兵。九邊各簡精銳。前赴遼東之急。好漢亦自有數。豈能多得。或被殺。或被擄。

或戀厚糧。住在山海。或懼再調。中途作盜。不肯回家。連年徵調。光景都是如此。所以九邊精銳。爲之一空矣。不特無軍。併無馬。無盔甲。無器械。何也。徵調一番。揀好馬。揀好盔甲。好器械。送至遼東。初間發兵後。亦還急急買補。後來年年置造。缺少錢糧。亦就不能復補。九邊軍馬。到遼東。何曾見一陣。何曾濟一事。上沈吟云。無盔甲。無器械。司馬前跪又奏。上云。整飭不得麼。臣家楨奏。天下無不可爲之事。如何整飭不得。臣見皇上諄諄望治甚切。臣胸中頗悉其事。安敢不直吐於皇上之前。皇上如此勵精。內外大小文武。孰非人臣。孰無願忠之心。從此一步一步實實做去。自有成效。臣見兵部尙書王在晉。邊情最是透徹。處置甚是得宜。邊方事。與腹裏不同。若非身親經歷。談說終隔一層。王在晉著實洞達。□□□□。無足煩聖慮。在廷諸臣。皆足了此。天顏霽。臣家楨又奏。臣民部也。閭閻小民之苦。併邊方守戍之苦。臣再陳於皇上之前。上云。奏來。臣家楨奏。自遼事以來。每年加派六百萬。今十年矣。豈不是六千萬了。皇上試想。此六千萬從何處得來。盡是小民膏脂。以此思苦。不言可知矣。上云。加派是不得已。此時不得不加派。臣家楨又奏。臣再奏。士卒守戍之苦。皇上試想。沿邊敵人。所以不入犯內地者。非士卒守戍之力耶。上領之。又奏。邊方或三里一墩。或二里一墩。每墩或五人。或三人。遇敵入犯。或放礮。或舉煙火。將官領兵出堵。然此輩小人。豈無疲倦。豈不飲食。敵出其不意拉去。或戕殺其命。或賣在敵中爲奴。性命不保。此等苦楚情狀。當在皇上天鑒之下。乃因臣部匱乏。或缺餉五六箇月。或至三十箇月。豈不是二年半。上問。三十箇月是那裏。臣對。是延綏。臣據彼中撫臣揭帖。上云。爾部所司何事。臣對。臣部匱乏。前奏已明。因入數少。而出數多。累年積

欠至此。上命起來問別部。

崇禎戊辰七月十四日召對平臺記言

上問戶部督師奏新餉不要那爲舊餉支用。臣家楨對。臣部新餉舊餉分貯兩庫。原不那借。近因北直地方不曾加派新餉。州縣糴買遼米遼豆。至動支舊餉。宜扣新餉抵還。往日遼急而九邊緩。故新餉用過舊餉。可不必清算。近有□之事。舊餉外解既少。內帑又且匱乏。不得不用新餉。扣還舊餉。所以太倉銀庫見貯舊餉約六萬兩。新餉十四萬兩。共計二十萬。不敢輕發。留以備□□緩急之用。此外再有解到。不拘新舊。當儘數發邊。上曰。將新舊餉再奏來。臣家楨又對。關內關外有新餉而無舊餉。薊密永昌天津新舊餉兼有。宣大有舊餉而無新餉。臣部以新餉發關外。以舊餉發宣大。至薊密等鎮有新發新有舊發舊。聽各鎮自己酌量那移。新舊款項各自明白。上曰。不差麼。臣家楨奏。臣所司錢糧絲毫不差。上另問。

崇禎戊辰七月二十六日召對平臺記言

上召戶兵二部問兵餉何以冒濫至此。戶部侍郎王□奏曰。兵餉冒濫已久。各邊有事。督撫累請添兵增餉。積弊已非一日。兵部尙書王在晉奏曰。國初有屯鹽之法。今俱久廢。所以日見餉多。上曰。屯鹽廢久。今兵與餉通不相似。臣鴻訓奏曰。屯鹽之法。卽古寓兵于農之意。伏乞皇上留意封疆。如太祖高皇帝立此良法。所以無虞不足。梁子璠精于屯政。前之不預巡方時。爲屯差御史。其法實實可行。上曰。兵還是這些。兵餉如何多了。臣在晉奏曰。國初設各衛所軍之精者。卽爲兵。軍政今廢。多有募兵。故兵日增。而餉自此

多矣。臣鴻訓奏曰。畢竟屯自有兵。軍不是兵。臣標奏曰。今軍與兵。果分爲兩事了。上又命子璠讀前疏畢。至老弱之人。曾荷戈而弗克。上側耳躊躇曰。荷戈者皆老弱。如何不查。隨即敕戶兵二部。差廉幹司官。挨年挨月。查覈具奏。



疏 奏 城 玉

著 盛 永 葉

玉城奏疏

本館據經川叢書
本排印初編各叢
書僅有此本

玉城奏疏

明玉城葉永盛著

勘報水災疏

巡按江西監察御史臣葉謹題爲遵例勘報地方重大水災懇乞天恩亟賜優恤以全生命事據江西布政司呈蒙臣紙牌照得洪水爲災仁人所隱邇從虔南歸省所過臨吉士民紛紛以水災奔訴謂數年之內無如此歲被災之烈及由豐城抵會城訴者益衆談災狀益甚蓋由一省之水至此總會而川原平衍匯聚難消亦其勢然也本院承乏茲方與諸士民誼猶同室同室有災披髮號救此休戚一體至情亦自是當爲職分第念民瘼國計二者並重抑民瘼而不以聞罪也聞而不以實一切扶同欺罔亦罪也切照江省濱江在在稱災而地勢有高下川原有多寡則水災之分數因之一省之中各郡不同一郡之中各邑不同一邑之中各鄉又不同若不詳悉踏勘漫言盡災則無災及災輕之地悉冒重災之惠卽朝廷曠蕩之仁足以暨之其于臣子不欺之義謂何是又法之所不敢出也近見撫院疏揭業且具題顧勘報分數尤本院專責所據災民情詞及府縣單呈雖已批行司道會議但其中分數未定輕重未別恐扶同冒濫之弊未必盡無相應照例覆勘爲此仰司呈堂卽便會同守巡南昌湖西各道選委精明府佐或隔別正官親自踏勘的確分數冊報固不得過爲裁抑以病災民亦不得妄行增捏以虧國計具由速詳等因

蒙此案照先蒙本院批據南昌兵備帶管分守道僉事史旌賢分巡南昌道副使朱維藩呈詳查過南昌、新建、豐城、進賢四縣水災。又蒙批據分守湖西帶管分巡道副使兼右參議陳一洙呈詳查過清江、峽江、吉水、泰和、萬安、廬陵等縣水災各緣由。俱蒙批布政司會同守巡道勘實分數酌議停妥速報。以憑具題。繳依蒙行准守巡南昌道咨據南昌府申稱。行委本府通判石有聲覆勘得南昌縣被災田八分三釐。新建縣被災田八分二釐。豐城縣被災田八分三釐。進賢縣被災田八分等因。備牒過府。申報到道。該二道會勘得江省役繁賦重。土瘠民貧。無歲不被水。亦無歲不議蠲。藉令被災未甚。則國計民命並重。亦安敢望徼曠蕩之恩也。不謂積困之後。罹此重災。流徙嗷嗷之狀。職等前詳亦既及之。茲舉委官重覆查勘被災田畝。南昌縣八分三釐。新建縣八分二釐。豐城縣八分五釐。進賢縣八分。各分別定擬。俱已允當。故今日蠲折之典。在各屬災黎。所謂喁喁望恩澤者。其勢誠急。其情誠非虛也。合無仍照二十三年舊例。漕糧全准改折。每石折銀五錢。腳耗銀二分三釐。原額副米。與三六輕齋過江湖蘆蓆板木銀俱免派徵。扣留贓罰商稅課鈔富戶橋稅等銀。抵補蠲免存留。并將運船減存月糧。抵作各縣查勘堤圩修築工料。至于二十四年南糧。併請通省改折。每石五錢。副米船驢腳價俱行免派。如南新二縣原經改折者。亦應暫照例減至五錢。庶國計無損。而民瘼稍甦等因。并准守巡湖西道咨據臨江府申稱。行委本府同知石天麟覆勘得清江縣被災田八分。通判夏久安覆勘得峽江縣被災田八分二釐。推官潘士達覆勘得新淦縣被災田三分九釐。又據吉安府申稱。行委本府同知何耿覆勘得吉水縣被災田八分五釐。永豐縣被災

田二分一釐。通判胡文海覆勘得泰和縣被災田八分三釐。萬安縣被災田八分一釐。龍泉縣被災田三分八釐。通判唐時泰覆勘得廬陵縣被災田八分一釐。各備牒過府申報到道。該二道會勘得吉安、臨江二府所屬萬安、泰和、廬陵、吉水、永豐、龍泉、峽江、新淦、清江等縣沿河一帶水災異常。以被災地方計之。即十分不啻也。以通縣田土計之。其分數則有等焉。已經委官覆勘前來。萬安、廬陵各八分一釐。泰和八分三釐。吉水八分五釐。峽江八分二釐。新淦三分九釐。清江八分。永豐二分一釐。龍泉三分八釐。所可議者。惟有改折漕糧而已。蓋改折每石五錢。正副腳耗等費在內。所省頗多。倘蒙憫念災民。議請漕折。則上之無損國計。中之不煩官帑。下之大益民間。一舉而諸利附焉。軫恤之方。計無便于此者。等因。各備咨到司。准此。該本司左布政使夏良心看得江西濱江諸邑地多低下。一經積雨。俄頃滄沉。以是告災之民。迄無虛歲。溯自萬歷十四年以來。災患游臻。閭閻愁苦。二十四年。僅稱有收。亦非全稔。民困未甦也。不謂今四五月間。洪水漲溢。南昌、吉、臨等屬。近江一帶。一望瀰漫。所在圩堤。衝決如洗。甚有一家而沒數命。至漂田廬畜產。又其小者也。嗣後氾濫雖息。而湖水匯聚。彌月不消。晚種愆期。西成絕望。據報慘苦情形。皆疇昔所未有者。夫南昌、吉、臨爲江省大郡。生齒極繁。積儲最窘。疊災之後。罹此重災。民胡以堪。流離轉徙。勢所必至。誠不得泄泄視也。據報被災分數。除新淦、龍泉、永豐等縣俱三分上下不斂外。南昌縣被災八分三釐。新建縣八分二釐。豐城縣八分五釐。進賢縣八分。清江縣八分。峽江縣八分二釐。吉水縣八分五釐。泰和縣八分三釐。萬安、廬陵二縣各八分一釐。俱行各府覆查明確。所以爲揆災計。不出蠲與賑。及折兌修

圩數端。然當國計多事之日。凡有關於國計者。豈容輕議。但江省爲腹心之地。揀災實根本之圖。今此災民啼飢號苦。無以贍私家。何以完必征之公賦。是蠲免不得不議也。困悴仳離。無可資升斗。何以辦數萬之額儲。是改折不得不議也。蠲折議矣。諸無產窮餓。胥嗷嗷待哺。莫可聊生。不一揀賑之。寧不爲溝中之瘠乎。江湖間田畝。惟倚圩堤爲耕穫。無圩是無田也。今在在衝決。無力培修。不一補助之。寧復有完築之期乎。是蠲賑數端。此固節年所已行。尤今日災黎所企望者也。合無呈乞將南昌、新建、豐城、進賢、清江、峽江、吉水、泰和、萬安、廬陵十縣二十五年分漕糧。照例全准改折。每石折銀五錢。庶上不虧惟正之供。下可舒阡危之衆。惠行不費。民藉稍甦。此亦兩便之術也。至蠲免例止存留。仍須坻補。圩墻盡爲水窟。修築稱艱。且哀哀望賑。處處同聲。雖各縣奉文發倉穀賑施。而有限之儲。澤難遍及。此非數萬金無以濟事。查得江省歲辦無派之燒造。補缺額之祿糧。近且有協濟之木價。計此數項。數逾四萬。百方搜括。帑藏一空。非請留錢糧。別無措處。查得本司庫貯。止有戶工二部事例銀五千兩。稅契銀一千兩。富戶銀一千兩。并請將兩院二十五年分初限贓罰銀六千五百兩。司道本年分贓罰銀一千兩。贛州府橋稅銀一萬兩。通共銀二萬四千五百兩。皆屬解部之數。但目擊民艱。揀濟無策。惟此數項。庶幾可留。乞賜題請。爲抵蠲賑濟脩圩之費。庶災民被澤。而地方永利矣。再照通省今歲無處無災。祇以分數不多。難以災報。今南北二糧。一時並徵本色。民實難堪。請將二十四年各府未解未徵南糧。照二十五年事例。一體改折。得賜並題。又通省疲民之福也。等因。具由同委官覆勘過被災田畝。與各原額稅糧數目文冊。呈繳到臣。案照先奉都

察院勘劄准戶部咨爲欽奉聖諭并陳末議以廣德意以消災疹事該本部題奉欽依今後但有災傷去處掌印官逐一親自踏勘總計被災地畝以定分數一面申巡撫具奏一面造花名地畝文冊送巡按覆實定擬的確分數從實奏報夏災定限五月以裏秋災限七月以裏又奉咨劄地方災傷俱要恪遵前例仍責成該府掌印官選委府佐及隔別正官從實踏勘不許先後一官以致扶同失真又奉咨劄如遇地方災傷務要據實勘明依期奏報有田者議免錢糧無田者卽與賑濟俾有田無田均沾實惠各等因依奉通行遵照在卷今據前因查得被災各縣已經撫臣陸照例題報外該臣看得江西臨吉南昌諸郡皆濱江窪下之地一經霖雨頃刻瀾漫數年以來以災告者屢矣臣以二十四年入境見禾稼稍登居民安枕不勝爲地方稱幸詎意今年四五月間大雨連綿經旬不止惟時臣巡歷虔南告災者踵至然虔地頗高水勢易涸雖有損傷未爲大害迨臣由虔還省泛舟過萬安泰和廬吉等邑則見夾岸老幼所至嗷嗷以災告者日數千百臣引睇四顧巨浸滔天城郭居廬盡遭淹沒濱江男婦逃避不及者皆連屋漂流化爲魚鼈僵屍相枕以數千計悲號哭泣之聲徹于四境比至峽江豐城南新間則一望瀾漫無復涯涘登高極目禾稼絕蹤臣周覽至此不覺愴然心裂然猶謂目所經歷者固然他未必爾及還省牌行各官細勘大都各鄉圩岸與臣所目覩者無異蓋各邑田廬萬頃惟恃一縷圩堤蟻穴稍傾潰裂四出亦其勢然也且嗣後水勢匯聚經月不消早禾旣已久浸盡腐晚禾又已過期難栽洵洵人情以爲數年以來無如今歲被災之烈爲照江西土瘠民貧賦繁役重全恃豐稔相仍庶幾室家相保今自十四年以來災居□

半如羸病之夫。元氣屢耗。復遭重疾。其何以支。若不急爲撫恤。彼貧苦無聊之民。不淪爲溝瘠。則聚爲萑苻。殆不知其所終也。顧撫恤之術。大都不過改折蠲賑數端。蓋漕糧改折。被災重者。舊例每石五錢。正副腳耗等費在內。所省頗多。且毫無損于國家之正額。而大有益于垂罄之飢黎。所謂上下兩利之術。無踰于此。卷查萬歷二十三年水災。各郡漕糧。悉蒙皇恩改折。今之水災。更甚于昔。若不照例改折。則數千萬石之本。何能取辦于沮洳之荒區。臣以爲改折之典。乃江省之所喁喁而望仁者。今日揀災之第一義也。合無俯念災民。除新淦等縣災輕者免議外。將南昌、新建、豐城、進賢、清江、峽江、吉水、泰和、萬安、廬陵十縣。二十五年分漕糧。照例全准改折。每石折銀五錢。庶國不虧而民用省。上無費而下自充。不越乎一改議。間而三郡淪胥之民。受皇上之洪賜無窮矣。又查改折之外。舊例蠲賑修圩等議。皆歷蒙聖恩。并及至于抵補。蠲免及散賑修圩等費。皆蒙于解部贓罰事例。稅課等銀扣留運用。目今倭虜交訌。饋餉告訕。宮殿繼燬。土木繁興。此乾坤何等時。臣等方日夜拊髀。恨無以佐國家之急于萬一。忍復言扣留國課。以仰貽度支不給之憂哉。顧念今日國家之費。固非常之費。而今日西江之災。亦非常之災。軍興造作之務。固皇上之務。而西江百萬之民。亦皇上之民。矧今時值艱難。災變繼作。所賴以維持國脈。全恃此未離之民心。西江爲南甸重地。腹心要區。苟能爲皇上固此一方之人心。卽稍損公帑之百一。而所全者多。似又不在區區盈縮間論者。查得該省抵蠲散賑及修圩等費。非數萬金不可。今帑藏空虛。別無措處。惟是戶工二部事例銀五千兩。稅契銀一千兩。富戶銀一千兩。撫按二十五年初限贓罰銀六千五百兩。司道本年分

贛州府橋稅銀一萬兩。通共銀二萬四千五百兩。皆屬解部之數。倘蒙皇上于國計人心之間。權其緩急。捐前項銀數。以惠此待哺之民。則億萬百姓之感。恩。驩。呼。有若更生。同心以戴皇上。不啻天地父母。所費者尺寸。所維持鞏固者無窮。此謂似損之而實益。利于民而亦未始不利于國者也。再照江省今歲之災。在在而是。祇以分數不多。例難盡報。若南北二糧。一時並徵本色。勢必難完。目今南中紅腐相因。所少非粟。合無請照新題二十五年事例。將二十四年各府未徵未解南糧。并請改折每石五錢。其副米及船驢腳價等項。俱行免派。如南新二縣。原行改折者。亦暫照例減至五錢。庶寬一分。則受一分之賜。此又皇上浩蕩之恩。而非臣所敢必者也。伏乞勅下該部。再加查議。如果臣言不謬。速爲題覆。將南昌等重災十縣。二十五年漕糧。全准改折。每石折銀五錢。應免存留錢糧。照例蠲免。所免之數。准將前項扣存銀兩。如數抵補。稍有贏餘。卽爲賑濟。修圩之費。其餘各府二十四年未徵未解南米。一體改折施行。生靈幸甚。臣等幸甚。惟復別有定奪。緣係遵例勘報。地方重大水災。懇乞天恩。亟賜優恤。以全生命事理。未敢擅便。爲此。今將司道隔別委官查勘。過南昌。新建等縣。災傷田畝。該臣重覆查覈。無異。定擬的確分數。見在理合開坐具本。差承差甯元昌親齎。謹題請旨。

差璫播虐。乞誅首禍疏。

雲南道監察御史臣葉謹。題爲差璫條議。播虐無窮。懇乞聖明。亟賜停遣。仍乞大奮乾剛。誅首禍。以懲瀆奏。以安生靈事。邇者礦店煩興。權議繼起。中使狼戾。棍黨橫行。西北江浙之間。不勝其擾。惟是留都根本。

之區。稍稍安枕。臣竊爲此一方私慶。不意無賴武弁鄭一麒。馬承恩。韓文盛等。有儀真獻店設權之請。嗣京口免遣。而儀真縣等處之稅如故。已經科臣連疏抗論。未蒙俞允。臣方欲具疏復論。忽接邸報。見供用庫左副使暨祿一本。爲欽遵簡命。條議復舊稅。靖弊端等事。內開沿江各府州縣。內外河道。有裝販私鹽貨料等項。竝容其統屬覺察。夫自古設權。止於江湖要津。竝未連及於各府州縣。亦止商賈裝載。竝無土商土著名色。原奏官馬承恩借一儀真。而牽連沿江上下要津。借一商稅。而巧立土商土著名色。其設計造謀。蔓延四及。已罪不容誅。乃暨祿又從而推廣之。承恩曰沿江上下。而祿又益之曰各府州縣。承恩曰要津通衢。而祿又益之曰內外河道。夫江南諸府縣。雖深山窮谷。何處無河。何處無水道。雖窮鄉僻塢。亦何處無土著。何處無交易。今不論內外。盡欲責令官兵搜括隱稅。此說一行。將舉留都之府縣。舉各府縣之河埠。細及米鹽雞豕。粗及柴炭蔬果之類。一買一賣。無物不稅。無處不稅。無人不稅。自是縣無寧村村無寧家。內外騷動。貧富竝擾。流毒播虐。寧有紀極。此開闢以來所未有之暴也。暨祿又曰。名不正則事不當。欲將韓文盛等。給與冠帶。委官名色。庶免勢豪復挽假官之玷。頃者畿輔之間。假官私委。已不勝擾。然曰假官。人猶得持其短長。彼猶隱然惴懼。惟恐一朝敗露。譬之鬼魅魍魎。晝伏夜出。肆害尙小。今旣欽給冠帶。彼將顯然以命官自居。恣睢縱肆。何所不至。即使噬人白晝。掠貨通衢。如狼如虎。如盜如寇。誰阻之者。且中官藉此輩爲爪牙。此輩又藉各土棍爲羽翼。凡十室之村。三家之屋。有土著。卽有土棍。有土棍。卽有藉土商名色。以吞噬鄉曲者。是獠獍連袂。而戎莽接踵也。民尙得安枕而臥哉。聖旨謂不忍加派小民。

臣謂加派雖云害民。然派有定額。徵有定制。不如制者。上司猶得以三尺議其後。此則橫心所逞。更無限制。橫口所噬。更無忌憚。告之府縣。府縣不敢理。告之撫按。撫按不敢問。告之陛下。陛下又以爲阻撓。而反罪之。民怨結胸。哭泣徧野。如是而人心不離。天下不亂者。自古及今。未之嘗聞。此其事非加派。而害更甚於加派。皇上不忍之彼。而獨忍之此。是知挺之殺人。而不知刃之殺人也。在皇上之意。以爲徵商稅。乃所以蘇小民。不知奏內土著土商。正所謂小民。民與商。其實無兩。諱言於民。故駕言於土商。此羣小之巧計。奈之何其不察也。臣聞天子以四海爲家。所不足者非財。此數萬之稅。歛之百姓。不啻腴骨髓。聚之內府。不足當毫毛。爲毫毛無益之積。而貽百姓以流離困苦之憂。已非聖明所宜忍。而況上取一下。取二。官取一。羣棍又取二。利則歸下。怨則歸上。名則朝廷蒙其垢。實則羣小享其益。陛下何苦身自歛怨。而予奸黨以劫奪之藉爲也。抑臣尤有慮焉。皇上仁聖恭儉。而此輩妄意測度。百計逢迎。始以採鑄投一中。而皇店之議遂起。繼以店稅投再中。而湖口之議又起。今且復及于儀真。又藉儀真而牽入於沿江內外河道矣。小人之策。愈造愈工。愈流愈博。長此不已。不至率土被毒。海內蒙殃不止者。人窮則亂。恐斬竿揭木之變。不旋踵起也。伏乞皇上燭羣小之奸謀。軫無窮之蔓禍。輕目前之小利。思將來之隱憂。收回成命。亟停暨祿之遣。仍將首事鄭一麒。馬承恩。韓文盛。林廷桂等。付之法曹。斬首藁街。以爲將來欺君奏瀆者之戒。庶大聖人之作爲。高出尋常萬萬。將狐鼠驚魂。奸謀永戢。小民安枕。而宗社禔麻矣。緣係差璫條議。播虐無窮。懇乞聖明。亟賜停遣。仍乞大奮乾剛。誅首禍以懲瀆奏。以安生靈事理。未敢擅便。爲此具本。謹題請旨。

浙江鹽政第一疏

巡按浙江監察御史臣葉謹題爲浙課甚微不堪侵奪邊儲最重歲額難虧乞燭羣姦欺誑亟行罷遣以裕邊計以保宗社事臣聞九邊者京師之籓籬儲餉者九邊之命脈故必九邊固而後京師安尤必儲餉足而後九邊固鹽法者所恃以餉九邊固籓籬以擁衛京師者也故祖宗朝視鹽法爲特重有違制阻撓者雖懿親勳戚必罪無赦非徒重鹽法也重鹽法所以重邊防重京師重宗社也臣見近時羣小如田應璧吳應其等欺君妄奏致兩淮蒲解之間鹽法大壞方不勝扼腕猶幸而兩浙晏然無事乃近接邸報見忠義右衛百戶高時夏一本爲遵照見行事理疏通鹽法裕國使商事奉聖旨這奏內浙福等處鹽場累年積蓄鹽堆及壅塞引目疏通變價每年約有銀三十萬兩有裏國用准著浙江督理稅務內官劉成福建督理礦稅內官高窠不妨原務各帶管彼處督率原奏官商士民前去會同各該撫按等官查理銀兩解進不許擾害地方欽此臣一見之不勝駭愕以爲棍徒敢于無端欺誑一至于此臣請得而明折之據奏謂浙福餘鹽堆積歲可得銀三十萬夫福建鹽利臣不能知請言兩浙浙課歲額解京銀一十四萬給邊商銀約九萬七千總計共二十三萬七千兩之數然此二十三萬七千者不盡出于鹽也內沿海沙地之稅及竈戶丁口之稅諸項總計凡十四萬有奇其爲鹽引紙價者大約不過九萬而已夫以額課尙不過九萬而謂有餘鹽乃可獲一二十萬之多乎其爲欺誑不辨而明矣然使此課銀九萬者歲歲無缺猶可支給然而不能也兩浙行鹽共五十萬引行鹽之地僅十六府一州內杭州嘉興湖州松江紹興寧波

台、溫等八府皆近海出鹽之地。彼小民近取諸海，即可以供食，肯捐囊金以買鹽乎？雖刀鋸日加，鞭扑日用，欲官鹽之如數買銷，此萬萬不能。則所恃以完此九萬之課者，僅金衢等七八府彈丸之地而已。夫行鹽之地既狹，則買鹽之人自少，以故引目壅滯，而課銀往往短少。解京不敷，不得已而那借給邊商之銀以湊解，致使邊商坐守四年，尙未領價。是見在課銀尙苦不給，日廩廩有掣襟露肘之虞，而謂此外復可得餘鹽銀一二十萬乎？其爲欺誑又不辨而明矣。大抵行鹽止有此地方，食鹽止有此人數，縱使餘鹽果如山積，而足食之外皆無所用，亦必不能于額課之外而復行餘鹽。而況邇歲陰雨連綿，竈戶煎辦不前，商人坐場守支，有年餘不得鹽者。今諸姦乃云餘鹽如山堆谷積，真青天白日之下爲鬼魅之談也。思此輩之意，不過欲得皇上一俞旨，輒分布諸場，占據鹽利，私賣私販，任其縱肆，各飽私囊，不知此輩之計一行，則額引盡行停闕，引課盡行虧缺。彼商人捐膏血以輸之九邊，不遠萬里而來，乃竟不得分毫鹽利而歸，有挾資掉臂而去耳。誰肯復輸芻粟于邊哉？夫邊無芻粟，軍士奚食？陛下試一思之，彼百萬貔貅，能枵腹而待斃乎？恐九邊之變，不旋踵而起，而籓籬旣壞，腹心并危，禍且移之內地矣。即使內府金寶山積，能晏然而坐享之哉？此輩赤貧棍徒，何所顧惜？陛下爲宗社萬世慮，奈何以祖宗邊防大計，而坐壞于一二宵小之手也？伏惟垂神三思，加意邊儲，將臣疏勅下戶部查議，亟停高時夏等之遣，庶鹽法不壞而饋餉充藩蔽無虞，而內地固矣。商民幸甚，社稷幸甚。緣係浙課甚微，不堪侵奪，邊儲最重，歲額難虧，乞燭羣姦欺誑，亟行罷遣，以裕邊計，以保宗社事理，未敢擅便，爲此具本，專差承差徐禮齋捧，謹題請旨。

第二疏

巡按浙江、監察御史臣葉謹題爲浙鹽餘積毫無、妄奏大違祖制、乞勅會勘、以明虛實、以杜姦謀、如欺、微臣甘罪事。頃該忠義右衛百戶高時夏奏開浙福餘鹽山積變價歲可得三十萬、臣聞報驚惶、業已十一月初九日具疏專差承差齎奏、其時未見原奏官條議、尙未及詳斥其姦、方在候旨未下間、復見高時夏又有條陳末議、清理鹽法之奏、奉聖旨、這奏內合行事宜、著浙江督稅內官劉成、福建督理礦稅內官高察、督率原奏官商士民、各分所管地方、會司撫按等官、酌議而行、欽此。夫不曰依議、而曰酌議、在聖明已洞知棍徒虛誑、其言決不可行、故令撫按等官共酌之耳。臣當靜聽會議、何敢復贅、顧事關職守、有不容默默已者。據時夏條議疏中、狂悖無狀、不可縷數、姑摘其姦欺之大者、爲皇上陳之。臣查得大明律內開一款、凡犯私鹽者、杖一百、徒三年、鹽貨竝入官、若知情故縱者、同罪。今時夏條議、謂欲沿途盤詰、凡與販無引私鹽者、較其鹽數若干、量酌小稅、給票放行、是私販者不杖、不徒、不沒、官明知之、而故縱之、使私鹽公行、官鹽將盡廢也。有是理乎？又查得大明律內一款、凡將有引官鹽、不于所該行鹽地面發賣、轉于別境犯界貨賣者、杖一百、其鹽入官。今時夏條議、謂有越境販賣者、照前私鹽例、給票收稅、是越境者亦不杖、不入官、反明給官票、令之肆行、使額引盡停、而國課盡缺也。又有是理乎？夫大明律乃高皇帝親定、其神謨睿慮、高出千古、後世人臣、誰敢毫髮更易、而況鹽課一節、尤邊儲國計所關、故律令垂法、獨詳、今時夏欲縱私販、縱越境、是不知有大明律、不知有皇上之法、又不知有高皇帝舊制矣。又據條議內、欲將各

場推積等鹽。招商變賣。夫兩浙出鹽之地原少。故額課不及兩淮四分之一。加以邇時水旱不時。竈戶逃竄。海波衝決。竈地傾頽。鹽之所出日少。故在窮竈。則鹽未煎。而先那商價以糊口。在各商。則引預告。而待竈鹽。以應掣。東移西湊。額鹽尙若不足。又何從得餘鹽。所有者。不過商人價買之鹽。貯于各倉。或貧竈煎熬之鹽。候給與官商者耳。時夏輩豈不明知。而敢爲此無影之奏。無非欲僥倖明旨之一降。卽分布諸姦。下場強霸。或指官商已買之鹽爲餘鹽。或指貧竈待買之鹽爲餘鹽。廣招弘販。賣價烹分。各饜其腹耳。此計一行。則舉官商間關萬里之費。盡爲若輩所攘。勢必裹足遠去。莫肯輸芻粟于邊。而邊兵擾攘之禍立見。舉貧竈勤苦度日之需。盡扼喉而奪之食。而濱海數萬之衆。無所控告。勢必嘯聚跳梁。而東南之事。有不忍言者矣。談及至此。識者寒心。皇上聰明神聖。試一靜思。利害自見。而猶銳意於搜括者。無非覽時夏所繪之圖。見有餘鹽山積。且其上有樹株茂密。信以爲鹽果如此之多。臣則謂餘鹽絕無。與時夏之奏。天淵懸隔。臣卽剖心見膽。必不能仰動天聽明矣。欲遂絨舌。但時夏奏稱。浙福餘鹽。可變價三十萬。而明旨維嚴。方欲查理解進。臣查浙課。除地稅丁稅之外。僅僅九萬。而餘鹽之數。視正額不啻加倍。卽使化土爲金。萬萬無充解之理。日夜思之。欲加派于商。則商人重困。必遠竄而不來。欲加徵于竈。則空骨無髓。縱敲取其何益。欲減解部之數。則濟邊正課。毫忽難虧。欲扣給商之銀。則四載守支。萬難再尅。欲聽羣姦之橫肆。則鹽法大壞。而國課邊儲。悉舉而入無賴之囊。轉展圖維。措處無策。極鳴哀籲。天遠聽遙。臣之計。于是乎窮矣。獨計時夏旣云餘鹽山堆谷積。此則有目者之所共見。必不可以囊袖藏者。陛下縱不信。乞卽勅

原奏官民指引山堆之鹽。在于何縣何場。所謂鹽堆之上。樹株茂密。合抱森森者。在于何處。著令撫院等官同臣及督稅內官勘驗。果如原奏官所云。則欺君之罪在臣。臣甘伏斧鉞之誅。如其果虛。乞念邊防大計。祖宗二百餘年相守成規。亟停搜括。則鹽課不虧。而儲餉以足。詎獨微臣及商民之幸。實宗社無疆之休也。緣係浙鹽餘積毫無。妄奏大違祖廟。乞勅會勘。以明虛實。以杜姦謀。如欺微臣甘罪事理。未敢擅便。爲此具本。專差承差王成慶齎捧。謹題請旨。奉聖旨。原奏官民高時夏等具奏。浙福二省餘鹽山積。變價歲可得銀三十萬兩。已有勅旨。著內官劉成高案。會同各該撫按等官。鹽議解進。這本說。浙江餘鹽絕無。果否虛實。還著內外官員。公同查議明白。奏請定奪。立限與他。該衙門知道。

第三疏

巡按浙江監察御史臣葉謹。題爲浙鹽餘積毫無。妄奏大違祖制。乞勅會勘。以明虛實。以杜奸謀。如欺微臣甘罪事。據浙江布政使趙欽湯。按察使李維楨。會呈。萬歷二十八年二月二十日。蒙臣奉都察院劄符。該臣題前事等因。奉聖旨。原奏官民高時夏等具奏。浙福二省餘鹽山積。變價歲可得銀三十萬兩。已有勅旨。著內官劉成高案。會同各該撫按等官。酌議解進。這本說。浙江餘鹽絕無。果否虛實。還著內外官員。公同查議明白。奏請定奪。立限與他。該衙門知道。欽此。欽遵。移咨轉行兩浙巡鹽御史。會同巡撫并內官劉成。遵照明旨內事理。查議明白。定限三月內。回奏施行到院。奉此。案行二司。從公會查。要見兩浙額鹽若干。歷年是否足額。額外是否有餘。餘鹽有無山積。近議行銳毀舊引。有無窒礙等因。蒙此。已經備行鹽

法道并兩浙運司查議去後。隨據運使蘇養蒙呈稱。兩浙四所。每年額派引鹽四十四萬四千七百六十九引。內除温州所引目二萬一千五百八引。隨到隨掣。不開外。今查杭嘉紹三所。年額派引四十二萬三千二百六十一引。自萬曆十九年起。至二十八年春季止。通計九年零一季。共該掣銷引鹽三百九十一萬五千六十四引。今查歷年以來。通共掣過三百二十二萬五千九百七十九引。較之年額。實欠掣六十八萬九千八十五引。仍有額外預告未掣者。共八季。實計缺鹽。通共九十九萬一千五百五十七引。設使竈有餘鹽。何不給賣于商。而停引不掣。商有鹽收。又何不照引買運。而困守數年。餘鹽之無。不待查勘而自明。矧有各場官攢印結。歷歷可據。再照引以行鹽。鹽以銷引。鹽既不足。致額引之欠銷。又欲廢引兼行。將引目之益壅。引既壅積。致額課之難完。又欲課外加增。將額供之益缺。九邊從此枵腹。商竈從此離散。等因。又准鹽法道右參議林汝詔咨稱。覆查無異。合行咨煩。覆議轉詳。并開杭嘉紹三所掣銷引數等因。到司。會議相同。呈詳到臣。臣等猶恐不的。復親往許村等場。逐一踏勘。但見窮竈釜空。灰冷。極目蕭條。毋論山堆谷積。卽稍有煎熬之鹽。皆預那商價糊口。鹽未出鍋。而商人已守而索之矣。正謂二月賣絲。五成糶穀。言之殊可酸鼻。勘後。臣復會同提督軍務巡撫浙江等處地方都察院右副都御史劉。巡按浙江監察御史李。內官監右監丞劉。反覆參酌。查看得原奏官民所稱餘鹽者。乃額外多餘之鹽也。今查浙課四十四萬四千七百六十九引。年年銷不及額。積之九年。共缺鹽九十九萬一千五百五十七引。是額內方苦不足。額外何得有餘。果有餘。彼貧竈何不變賣救饑。而甘心枵腹以待斃。商人何不買收營利。而甘心

困守至數年。餘鹽之無。誠不待勸而可決者。況臣等親臨踏勘。絕無影響。是不徒以理斷之。臆決之。而又以目覩之者也。鹽既無餘。課難加額。欲遂丐天恩停免。但內官以爲明旨森嚴。何敢以空文覆奏。必欲多方設處。以稱上心。乃搜查運司積有遠年廢引。計數一十五萬有奇。謂可變價解進。臣以爲引特一空紙耳。有引無鹽。卽引如山積。將安用之。況廢引數多。一時并行。則額引盡壅。邊餉何供。內臣必不肯已。臣仰體聖意。雖明知事體窒礙。不敢不委曲允從。乃聽內臣徧搜各場。得見煎額鹽。約可變課一萬五千餘兩。將前廢引。扣數給商。完課解進。外而內臣又執稱。各省運司。如河東兩淮之類。皆有歲解額課。欲比例措辦。臣等以爲浙鹽原與他處不同。他處之鹽。或以風吹日曬而成。不甚費人力。浙鹽全賴煎熬。人力百倍。欲加額課。商竈奚堪。似難比例。內臣堅執不從。臣勢不能強。反覆計籌。求所以措處之策。不過曰裁省與加派二者而已。查得臣衙門諸役。例有工食及出巡一切公費。皆勢之必不可無者。願臣爲鹽官。若不躬自節省。而徒加派于商竈。何以服輿人之心。臣將前項逐一裁減。約可得千餘金。再查濱海新懇地畝。或地腴而稅輕。或已熟而未稅。量行加派。及天賜場新增鹽課。并鹽牙稅銀。共前四項。約六千兩。此外將前扣餘廢引。那借額鹽行賣。足課一萬兩。廢引既完。卽于各商照引加稅。各竈照戶加煎。湊足前數。共稅額一萬六千兩。臣措處至此。自謂彈竭心慮。計盡而無復之矣。乃內臣復堅欲加課一萬兩。湊額二萬六千兩。原內臣之意。不過欲效勞皇上。爲國課求增。第增課愈多。則加派愈重。在商竈損此一萬。不啻去骨中之脂髓。在內府增此一萬。何足益滄海之分毫。況鹽務關係邊餉。最爲重大。區區兩浙煎鹽。止有此數。增

一萬國課必減一萬邊儲積之數年當缺一年之餉異日者九邊年例不敷戶部復有內帑之請未免更煩聖慮則又不若及今裁酌而留不盡于邊儲之爲得也伏惟皇上垂神三思如果念邊計甚重商竈難勘得停搜括上也倘以爲國課必不可已容臣歲辦額課銀一萬六千兩准以本年三月初六日勅書到日爲始按季徵解以濟大工俟工完卽止則兩浙商竈雖不能盡徵停免之恩猶所謂寬一分得受一分之賜倘俞內臣所奏必欲歲額二萬六千兩臣藐爾犬馬誠不敢違天恐自此而商竈愈困邊計愈虧其害將有不可言者矣惟聖明裁奪再照皇上頒勅內臣旣諭以安靜行事又戒以濫用匪人臣等莊誦至此相與感歎以爲聖明長慮卻顧眞所謂超出尋常萬萬臣等奉旨會議敢不兢兢祇承已與內臣公同面論前項歲解額課容臣委運司官管理徵完按季如數交內臣解進至于隨從員役遵照明旨止留原奏二三名應用其餘盡行逐回如此則事權歸一而彼此無紛擾之慮委用不濫而地方獲寧靜之休此又臣等仰體聖意而內臣亦同心而樂從者也併乞賜俞旨勅下戶部行臣等以便遵守臣及商竈無任籲鳴祈懇之至緣係浙鹽餘積毫無妄奏大違祖制乞勅會勘以明虛實以杜姦謀如欺微臣甘罪事理未敢擅便爲此具本專差承差朱雲齋捧謹題請旨

第四疏

巡按浙江監察御史臣葉謹題爲會議明旨未頒商竈離散可慮乞查近奏速賜允行以安人心以充國課邊儲事近因忠義右衛百戶高時夏奏稱浙福餘鹽山積歲可變價得三十萬臣具疏再籲奉旨原奏

官民高時夏等具奏浙福二省餘鹽山積變價歲可得銀三十萬兩已有勅旨著內官劉成高竊會同各該撫按等官酌議解進這本說浙江餘鹽絕無果否虛實還著內外官同查議明白奏請定奪立限與他該衙門知道欽此欽遵會同撫臣劉按臣李內臣劉公同將歷年掣鹽引目查算及親詣各場踏勘餘鹽委係絕無但明旨嚴森不敢以空文覆奏臣曲從內臣之議將運司銳廢引目變價一萬五千餘兩先行解進外復因歲課無辦議加派裁省諸項以湊額供之數在臣則議歲額一萬六千兩內臣則議歲額三萬六千兩撫按二臣則酌乎二者之間議額二萬兩已于四月十五日公同會藁具題迄今未蒙裁定續接邸報見內臣于本年二月間有條陳一疏至五月十三日奉聖旨是奏內應行事宜遵照前旨會議而行毋虧原奏銀兩額數亦不可因累地方原奏官高時夏領勅已經四月如何尙未齎到忝便嚴查上緊奏來定奪不許容縱該部院知道欽此夫皇上于臣等會疏則遲遲未允而于內臣條陳之疏則有毋虧原奏額數之旨意者以原奏兩浙該課十五萬而臣等所議乃若是之少或以臣等之勘議未必實而餘鹽絕無之說未必真耳夫兩浙餘鹽之有無皇上誠不得而親見若夫浙課解部濟邊歲止一十四萬載在大明會典其書見在前可取而覽也夫舊課止一十四萬兩而今新奏餘鹽之數乃至十五萬兩是餘鹽比正課反加多一倍有餘矣即使將解部正課盡解進內府尙缺一萬之數無從措處況部課係九邊年例急如星火皇上以爲可缺乎不可缺乎可盡解內府否乎部課十四萬旣不可缺而奏額十五萬又欲足數卽粉商竈之骨皇上以爲能足乎不能足乎且兩淮河東與兩浙同一鹽課也兩淮解部六十

萬解內府者。近議一十二萬。河東解部解邊共一十九萬八千。解內府者。近議不及三萬。是在兩淮則舊課十分。新進者止十之二耳。河東舊課十分。新進者尙不及二分。然彼二處鹽業已措處無策。哀鳴屢屢矣。今兩浙若欲毋虧原奏額數。是舊課十分。而新課尙溢十分之外。較之兩淮河東加重六倍矣。臣非能神運鬼輸。如之何能充額也。臣屢誦聖旨。皆云毋虧國課。亦不可妨損邊餉。今若求足原奏十五萬。則邊餉必至全無。不特妨損而已。皇上但見原奏額數。而未及細查兩浙舊課之數。故有此耳。倘一查閱會典。則原奏之欺立見。當必以臣等之會議者爲確矣。今兩浙商竈。自去年十月聞報以來。皆紛紛傳言。以爲朝廷將加倍派徵。不勝驚懼。議欲棄業逃散。商不買鹽。竈不煎鹽者。已半載矣。近因會議一疏。人心稍安。倘皇上復欲毋虧原額。則商竈驚惶如故。將來商必挾貲遠去。竈必流離思亂。不獨內供無措。部課無出。而海濱岌岌之勢。且在目前矣。此等景象。皆內臣所親見。臣非敢有一豪虛妄。以欺天聽也。伏乞皇上俯念浙課止一十四萬。必難加倍。查照兩淮河東事例。并細查臣等近日會議之疏。參酌聖心。速賜批發。庶明旨早降一日。則地方商竈早安一日。臣等亦便于遵行。而國課邊儲兩無悞矣。緣係會議明旨未頒。商竈離散可慮。乞查近奏。題賜允行。以安人心。以充國課。邊儲事理。未敢擅便。爲此具本。專差承差聞人嶠齋捧。謹題請旨。

第五疏

巡按浙江監察御史臣葉謹題爲會疏未蒙裁定。解銀未見賜收。冒死再叩。乞速降明旨。以定人心。以便

遵守事。臣頃者奉旨會議兩浙鹽課。與撫按內臣同日具疏上奏。并先將廢引變價銀一萬五千二百五十兩。付內臣隨疏解進。迄今待旨三月有餘。而會疏未蒙批發。銀兩未見查收。臣等不勝惶惑。臣每見皇上于各處解進銀兩。不論多寡。俱有收進之旨。今此銀也。以爲未收。則進解已久。似萬無未收之理。以爲既收。則查照往例。萬無不頒旨之理。臣夙夜疑慮。不知前銀竟置何地。縱內臣以爲已解進內府。而無明旨可憑。臣等孰從而信之。又查兩淮河東等處。凡係鹽課。皆荷聖慈軫念邊計。並從寬恤。有奏必允。必速。獨兩浙會疏。未蒙批發。或者以原奏一十五萬。而臣等所議太少。故聖意難之耶。然臣等之議。非漫無憑據。乃查照兩淮河東事例。而稍增損之者也。兩淮解部者。舊額六十萬。近議解內府者。一十二萬。河東解部濟邊者。舊額十九萬有奇。近議解內府者。不及三萬。屈指兩處之數。大約舊課十分。新課僅二分。且有不及二分者。浙課解部舊額。止一十四萬。不惟不及兩淮。亦不及河東。內臣所議之數。正與兩處事例相合。臣等以浙鹽煎熬甚難。尙欲求聖慈寬減。若必照原奏之額。取盈一十五萬。是新課比舊額反多一倍有餘。較之兩淮等處。輕重苦樂。天淵懸隔。卽粉商竈之骨。萬萬無完理矣。夫天下之商竈。皆皇上之赤子。天下之鹽課。皆皇上之邊儲。各處皆蒙寬恤。豈其于兩浙而獨欲加倍追征。在聖明必不其然。而今遲遲未發者。或者萬幾煩冗。一時省覽未及耳。然聖斷一日未發。則臣等一日無所遵守。地方商竈卽一日不得寧息。勢必廢業逃竄。轉而之四方。此其關於國計邊儲。非細故也。伏望皇上查照兩淮等處事例。及將臣等會疏。參酌多寡。批允額數。下部行臣。以便遵守。至于內臣已解銀兩。有無收進內府。明降聖旨。俾臣

等曉然共知。庶渙汗頒而羣疑釋。宸斷定而人心安。國計邊儲。並有賴矣。緣係會疏未蒙裁定。解銀未見賜收。冒死再叩。乞速降明旨。以定人心。以便遵守事理。未敢擅便。爲此具本。專差承差王承慶齎捧。謹題請旨。奉聖旨。這進到廢引。并見存煎鹽變價銀兩。俱交內庫查收。原奏官民高時夏等前奏。浙福二省。餘鹽山積。變價歲可得銀三十萬兩。有旨。浙江銀十五萬兩。著欽差內官劉成。會同撫按等官。查理解進。今覽奏內。會同撫按等官。查勘各處鹽場。并無鹽斤存積。虛謬如此。其公同酌量濱海地畝。新增鹽課。牙稅。并裁省公費。及各竈計戶。加煎。各商計引。加稅。歲辦共銀二萬六千兩。既經爾等內外官員合議無異。准著各該經管有司官員。照數徵收。每年解送內官劉成處。類總夏秋二季。解進應用。原奏官高時夏。誤聽妄奏。姑著回衛。鹽法關係國課邊餉。再不許紛紛更議。該部院知道。

戚畹殺師疏

巡按直隸等處。監察御史臣葉謹。題爲戚畹勢惡殺師事。據順天府學生員胡起家告詞。內稱。父生員胡九式。在戚畹李誠。認家教書。豈伊挾勢欺凌。家人白玉助惡。束脩十不給一。錢順宇等證。本年十二月初六日。因討惡束脩。觸惡羣兇。將父毆死伊家。復令李大李七。賺起家到彼。逼寫無事文書。起家見父尸口鼻流血。不允惡。卽令衆二十餘人。將尸內轎。抬擁到家。撇堂竟去。令趙相賄銀五兩。可據竊以弟子殺師。法干大紀。仇不共天。乞究治正法。等情。到臣。臣以事干戚畹。生員胡九式。未卜果否毆死。遽難具題。批行南城兵馬司。指揮趙承基。相驗去後。隨據本官呈稱。相驗得本屍左腮。腴青赤傷一處。量長二寸二分。闊

一寸八分。胸膛當正偏左青赤傷共一處。量長二寸七分。闊二寸二分。右後脇青赤傷一處。量長二寸三分。闊一寸九分。合面左後脇紅赤傷一處。量長一寸九分。闊一寸六分。餘無他故。當場審據胡起家詞稱。有先存今故父。被不在官皇親李誠總請作西賓。議定每月束脩銀三兩。一向在伊不在官家人白玉處支取無異。今年冬季三個月。該束脩銀九兩未付。于本月初六日。父早起親往李誠總府中討取。到本日午時。李誠總不在官家人李七李大特來家內。說稱師爺瘋病沉重。相公快去等語。起家急到李府。見衆人攢圍。比父氣絕。李大李七等將父屍擲上大轎。送回家內。痛父生死不明。將情具告南城等情。具呈到臣。猶恐不的。臣復自詣屍所相驗傷痕。并審胡起家口詞。與本官相審無異。該臣看得胡九式胸膛肋脇。俱有致命重傷。則非死于瘋病。死于毆打。可知矣。辰而生入。午而死亡。則其爲李府之人毆死。又可知矣。但不知起自何因。何人主使。何人下手耳。臣欲行提詞。內人犯根究死因。以事關戚畹。非仰奉明旨。未敢擅便。欲置之不問。又以殺人者死。天下之公法。若以勢豪執法。則命可無抵。而三尺空懸。卽皇上何以示大公于天下也。爲此不憚投鼠齒馬之誅。據實具奏。伏乞勅下法司。轉行原毆地方。拘提詞內有名犯證。及左右鄰人。與胡起家對質。要見胡九式之死。起自何因。何人主使。何人下手。一一根究明白。依律擬抵。庶朝廷無不伸之法。匹夫無不雪之冤。公道彰明。而人心大服矣。緣係戚畹勢惡殺師事理。未敢擅便。謹題請旨。

山東等道監察御史臣葉等爲遠臣風聞建議已蒙量譎更乞曲貸以成輔臣之志併亟改留中以一體以釋羣疑事近該原任南京兵部職方司郎中劉元珍參論科臣錢夢臯而因疑及元輔之私庇至謂留用夢臯及留大計科道諸臣皆非皇上本意而出元輔之煽弄仰煩聖明特諭內閣詳示以留用科道諸臣之故且切責元珍以妄言排誣欲看議重懲尋蒙勅論中外臣工內開寬小臣卽所以安大臣姑降元珍一級調極邊方用仁哉聖慈固已包荒如天而元軫得之已逾望外矣職等復有何言顧反覆思之與其量譎小臣以安大臣不若徑從曲貸之更爲安也何也珍之情微可原而夢臯之迹偶可訝也蓋林秉漢勘楚之議不發于楚議未決之先而突出于聖斷久定之後甚屬無謂夢臯論之未爲不可然使此論出于平時亦自言官互相糾舉之常其何說之詞乃是日聽考察卽以是早論秉漢當臣子待罪之日汲汲爲抗疏建言之舉在夢臯固自以爲盡職而人言藉藉咸謂其假楚事以逃計網排秉漢以圖自全蓋跡類竊鈇而形同駕禍卽甚愛夢臯者亦百口不能爲之諱矣夫夢臯此舉業已不見信于天下乃其受恩寵于皇上則固有獨異者近時科道推陞年例者固多留用然皆以明旨中格不得已而就列未聞有特旨留之者而特留自夢臯始此其蒙殊恩者一也近時言官建議者多留中不報卽報多遲至旬日獨夢臯參論秉漢隨上隨報而其報也適與計疏之期相值竟得及于寬政機會輻輳如式如幾此其蒙皇上之殊恩者二也近時建議得報報而且速者難之難矣夢臯不惟得報而且有溫旨特褒此其蒙皇上之殊恩者三也此三者皆近來言官所不能得之皇上而夢臯獨得之在皇上神明操縱間施不測之

恩或非有別故。以私夢臯。但外廷之臣。習見諸臣之疏。寢閣如彼。而夢臯之疏。嚮答如此。以爲區區小臣。何能遽邀聖眷。遂見形生疑。疑夢臯。因疑留用諸臣。至舉聖明獨斷之事。盡以爲元輔庇護之私。此在諸事體者。或多信其不然。而翫率如元珍者。新從外來。信耳輕舉。遂不覺逞臆形之章牘矣。此亦偶緣風聞。而臆度之過也。顧過則過矣。向使皇上于大小臣工之疏。俱一概嚮答。無異夢臯。則夢臯之蒙特旨。天下亦自以爲常。何疑何駭。而指摘及元輔哉。故元珍此舉。亦因邇來疏多留中。政體不一之故。言雖過。而心則無他者也。皇上初議重懲元珍。今止量謫。所以寬貸之者。已逾望外。顧以職愚計之。自古宏度之君。不以語言而罪臣。自古雅量之相。亦不願君以己故而罪建言之臣。今聖諭已頒。元輔心事已昭。從此可以帖然而無疑慮矣。若仍處元珍。卽曰薄乎云爾。恐爲元輔者。終不自安。與近疏所謂誓不傷言者之一毛。尙未免刺戾矣。職故以量謫小臣。以安大臣。不若徑從曲貸之。更爲安也。至于各衙門諸疏。亦乞皇上隨批隨發。當與不當。俱明示意旨。無或異同。則政體旣一。羣疑自消。不煩勅諭。而天下洞見密勿舉動。如日中天。誰敢有異議者。倘仍留中。而間發一二俞旨。以示不測。恐不諳事之夫。妄疑如故。見蒙恩者。以爲元輔之德憑。見寢閣者。又以爲元輔之不救正。則元輔之蒙疑。何時而白。而其心何時而安也。職故以除留中一節。爲第一義。關係治亂興替之一大機括也。惟聖明留意焉。職等無任戰慄待罪之至。緣係遠臣。風聞建議。已蒙量謫。更乞曲貸。以成輔臣之志。并亟改留中。以一政體。以釋羣疑事理。未敢擅便。謹題請旨。

山東等道監察御史臣葉永盛等爲人品宜辨、公論當存、敬陳會推始末、仰祈蚤定、枚卜事、頃者皇上以閣臣缺員、有旨諭令輔臣朱傳于、吏部左侍郎楊時喬、公同九卿科道官推補員缺、隨該楊時喬于十七日約職等畢集于東闕、班旣定、職等隨向楊時喬等索單草一紙共觀、內開列于慎行、趙世卿、劉元震、葉向高、李廷機、楊道賓、孫丕揚七員、此職等未至之先、九卿大臣從公會議、並無異同者也、傳閱旣遍、職等科道官多以爲當獨刑科右給事中曹子汴謂李廷機旣挂彈章、不宜列名、時科臣陳治則邵庶等皆以爲廷機雖經彈論、然清正有聲、終不當棄職、因宣言曰、天下豈有全人、論人當先大體、譬之人身、頭面四肢旣全、大體具矣、卽有癰疥疤痕、特細故耳、不害其爲人、李廷機清正二字、乃舉朝所許、卽論廷機者、亦未嘗不許其清、此其人于根本節目之大處、毫無虧損、正所謂具大體者也、縱或拘泥太過、于物情有未盡調、特小失耳、何害其爲正人君子、且短廷機者、不過以相自有度、彼乏相度、終不可作相耳、不知相臣之品、亦不同矣、卽以唐事論之、杜房姚宋、此其識度經濟勝者也、固稱名相、如楊綰特持清節、未聞它建立、然一拜相、而貴重如郭子儀者、頓爲之減驕、從徹音樂、古今以爲美談、則清相亦未嘗無補于世、何督過廷機之深、使清者而復求多、則人皆以清爲無用、恐修身砥行者懈矣、此其有關於世道人心、非小也、廷機正宜列名、時科臣陳治則、姚文蔚、孟成已、道臣何爾健、皆反覆辨論、與職議同、九卿大臣趙世卿等亦以爲然、惟是言官兩議相持、日中未決、科臣宋一韓從中調停、謂廷機誠賢、然旣與楊道賓俱有近議、宜並除去、以俟衆論之定、職又謬宣言曰、衆言淆亂、析諸聖、漢倪寬有言、惟天子爲能建中和之極、今科

道官既議有異。同所謂衆言淆亂之時也。正當並列名以請聖裁。豈容除去。道臣何爾健亦曰。三人占當從二人之言。今推轂廷機者十之八九。還以從衆爲當。時楊時喬是職等之議。因對衆言曰。使我去廷機名不列。終是不安。遂照原草單具疏開別二議。請自聖裁。疏上之後。果有連疏短廷機者。議論益煩。夫論廷機者言官職等亦言官也。豈敢內相矛盾。然天下大事非一人私議。短者自短。與者自與。原兩不相妨。況人各有見。見各不同。卽親如父子兄弟亦多不能強合。矧同列乎。職等所見與論廷機者之所見。要以各成其是。同一爲朝廷之心。非有私也。且聖諭云。會推素懷忠義者簡用。竊謂忠臣不私。私臣不忠。清臣忘私者也是謂忠。貪臣徇私者也是爲不忠。論廷機者業以清許之矣。果忠義否乎。是其言亦未嘗不與職等合。且未嘗不與明旨合也。夫簡相出自聖裁。職等何敢祈皇上之必用廷機。但以廷機既負清節。又經九卿大臣共推。亦宜存之以風世道。故當會推之時。而昌言若此。昨曹于汴等疏云。旣言于會推之所不敢不告于君父之前。故職等亦倣其意。而并達之宸聰。伏惟皇上折衷二議。獨出聖斷。蚤賜點用。相臣以息羣紛。以重政本。天下幸甚。宗社幸甚。緣係敬陳。會推始末。蚤定枚卜事理。未敢擅便。謹題請旨。

稅璫捏詞縣令被逮疏

浙江等道掌道事。山東道監察御史臣葉等。爲稅璫捏詞無據。縣令被逮可原。乞恢天度寬宥。以一法體。以協輿情事。職惟人主用法。必得其平。而後人心服。人主聽言。必酌以理。而後用法平。古帝王所以明見萬里。而讒說不行。忠良無枉者。用此道也。近者皇上激于稅使梁永之奏。而深恨咸寧縣知縣滿朝薦之。

殺人刼槓。赫然震怒。遣緹騎繫逮。顧雖逮朝薦。而又撤回梁永。付內監處分者。豈非知永之荼毒秦中。罪盈惡積。而必不可宥哉。知永之惡。必知朝薦之與永爲水火者忠矣。知其忠。而又逮之。何也。則以激于梁永殺人刼槓之一語也。夫刼殺乃盜賊之行。至無賴者之爲。朝薦誦讀詩書。起家賢科。儼然令百里。卽病狂喪心。何至爲盜賊之行。況殺人而刼進貢之槓。卽盜賊不敢爲。而謂朝薦爲之。萬萬無此理也。皇上之聰明神聖。豈不辨此。不過以朝薦雖不殺人刼槓。而遣差追捕。釁由彼作耳。不知朝薦之遣差。乃追捕照提犯人楊達官等。非追捕進貢差役也。進貢差人由東門大路出。楊達官等由北門小路出。原不同途。是捕役之所遇者。乃照提之犯人。亦非進貢之差役也。及兩相遇。而犯人魏二拒捕。重傷公差王大賓。因懼禍自刎。是魏二之殺。乃自殺之。亦非捕役殺之也。夫以拒捕殺人之賊。情急自殺。是以一命抵一命。卽追捕各差已屬無罪。況朝薦身在百里之外。事起倉卒。毫不相干者乎。今永乃以逃走之罪人。指爲貢役。何異指鹿而爲馬。以自殺之魏二。指爲朝薦之殺人。又爲移甲而禍乙矣。至于刼槓之誣。尤不待辨。據撫按疏內。永所解馬八匹。槓七擡。出于陝。入于河南。一一可查。則槓與馬原無失也。以未失之槓。而指爲刼槓。不惟欲下禍朝薦。且欲假此以自匿進貢之方物。上欺皇上矣。職以爲永可誅也。夫永及樂綱毒謀。按臣供招于吳得水等之口者。一一可據。而滿朝薦之殺人刼槓。無此理。又無此事。絕不可據。皇上視內外大小之臣皆一體。旣不肯以可據者而輕罪內臣武弁。況肯以不可據者而輕罪縣令乎。而顧繫逮朝薦者。不過偶觸于一時之忿耳。然外間妄測。遂以爲真欲罪朝薦。疑于重內臣而輕外臣。又疑于重武弁而輕

縣令似乎用法之間。稍稍未得其平者。今朝薦至矣。轉雷霆爲雨露。以釋外間之疑。此其時矣。倘蒙亟下明詔。赦朝薦。仍還其故秩。以爲小臣執法除奸者勸。此職等至願也。萬一以爲旣已繫逮。不可徒釋。則褫其職。而免其打問。仍治永興樂綱殃民禍國。謀毒按臣之罪。庶宮中府中。視爲一體。法無偏私。意無低昂。而天下仰大聖人作爲。高出尋常萬萬矣。職等無任激切籲鳴之至。緣係稅璫捏詞無據。縣令被逮。可原乞恢天度寬宥。以一法體。以協輿情事理。未敢擅便。謹題請旨。

巨豪蔑法疏

欽差巡按直隸等處監察御史臣葉謹題爲巨富豪奸。蔑法作弊。病商蠹國。大壞鹽政事。臣惟餉邊足國。莫大乎鹽利。然利之大者。弊亦大。而所稱弊之大者。類非猥瑣尋常之人所能爲也。必其財力氣焰。雄蓋閭左。可以通神。可以使鬼。可以衙官有司。而威制齊民。然後縱橫任意。公然敢行其恣睢之心。而莫之逆。則今長蘆豪商胡時順是矣。胡時順者。雖冒名武弁。實曾經再遣。隸名刑書者也。臣初不知其人。偶緣通州同知萬智建議。欲將昌平等處引鹽。盡歸通州轉運。庶足清影射。而足額供。其言似正。而其文移呈請之間。不無悖謬。若汲汲于欲行其私者。臣甚怪之。以後細訪。始知本官此舉。非爲衆商。止爲一胡時順。蓋從來衆商皆不無小小奸弊。然皆畏鹽官發覺。而稍稍啖之。惟是胡時順者。挾貲二十餘萬。父子濟惡。所謂財力氣焰。雄蓋閭左。能通神使鬼者也。彼固目無上官。而何有於一州同。萬州同愚而闕于勢。見其豪橫桀傲。筐篚絕供。意殊銜之。故偶值清查牙稅。遂建前議。蓋欲以此持時順短長。其意誠私。而其議則公。

其于法體誠闢而于發奸清弊則有裨者也。臣初不知其故而怒本官及廉知之則移其怒本官者。怒時順矣。正怒間有已故于鎮之妻張氏者。以主使毆命告時順。臣立遣數差攝之。而此數差者。止望門投稟。不敢出氣。僅得其一。家奴而歸。臣益信時順勢焰之大。而前所訪聞。果爲不謬。因思人命未委虛實。而鹽法係臣專職。安可置而不問。于是宵夜單騎。徑抵通灣。取時順所堆鹽秤之內。又字號鹽。每包重至九百六十斤。計上下兩店。共九百八十六包。業已賣盡。尙存十二包。又紅頂號鹽。二百五十二包。除賣過尙存一百包。每包秤重八百斤。以上引鹽。俱未報州。亦未報戶部北城。皆胡時順令家人胡慶等私自貨賣。鋪戶李文炳、彭子登、腳役張龍、戴愷。可審。嗟。嗟。鹽法至嚴。卽每包重至數斤。皆有罪無宥。何物大豪。每包敢夾帶三百餘斤。公然裝之天津。堆之通灣。而運司及巡鹽等官。皆無一敢問者。已可駭甚矣。且也。視公家之鹽。如私己之物。自貨自賣。全不報官掛號。蓋以不報官。不掛號。不但可匿牙稅。而水程仍可影射復販。往來循還。寧有紀極。真彌天大弊也。然此猶據臣所見獲者而言。查運司低冊。時順自萬曆三十年。以至三十三年。玩字等號水程。計二千六百餘引。至今竝未掛號。此皆留水程影射。計私販之數。又不知若干萬矣。臣又查商綱冊內。胡時順一人。捏詭名。稱夥計者。共四十餘人。大抵通州及昌平等七處。計七萬餘引。本犯占據過半。今以一包而夾帶三百餘斤。是以二引夾帶三引之鹽。此外又藏匿水程。往來影射。屈指而算。每歲夾帶及影射之數。豈止數萬引而已。又何怪乎引目之半壅。牙稅之大虧也。如此神奸。真字內希有矣。查得大明律內一款。客商收買餘鹽。至三千斤以上者。照例發遣。時順自報中以來。作弊不知

若干年。其爲三千斤者。不知幾千萬倍。若舍之不問。所謂縱豺狼而問狐狸。亦安用持斧者爲也。臣鹽官也。商人乃臣專轄。操縱在手。原無庸以是瑣瑣者瀆天聽。惟是本犯係巨富大豪。自以爲三尺所不能加。且盤據根深。卒難遽拔。臣故除一面行拏究處外。復具疏奏聞。蓋一欲仰仗天威。使臣得專意行法。一欲繼臣者。據此疏爲定案。得永絕其蔓。而斷其根。至于陰謀反噬。固兇人之性所必至。然而臣一念朴忠。惟知奉法除奸。他固不遑恤矣。惟聖明垂鑒焉。緣係巨富豪奸。蔑法作弊。病商蠹國。大壞鹽政事理。未敢擅便。謹題請旨。

賞奸非法、乞追匿賊疏。

巡按直隸等處、監察御史臣葉謹題爲賞奸非法、餘孽當懲、乞盡沒惡璫餘貲、并批發撫臣原疏、以追匿賊、以正法紀事。竊惟今天下稅使之害。在在而是。而惟陳增爲最甚。頃者增惡貫盈。幸逃陛下之討。而竟不能逃天之誅。其餘孽蕭昇、陳進才輩。皇急震恐。將所存房屋等項。開列奏聞。陛下不盡追其賊。而且以所餘衣物。并南城房屋。點賜增弟姪陳進才等。臣謂增之惡極矣。播弄撥置。皆其名下蕭昇及子姪輩爲之。卽亟置重辟。猶以爲晚。柰何復從優恤。卽欲具疏參奏。猶以爲陛下未悉增貪。未知蕭昇陳進才等撥置侵匿之狀。而第以爲增聚斂有功。不欲苛處。爲將來者勸耳。無何而御史王業宏以形跡可疑奏矣。巡撫李三才又臚列多賊。至不可殫數。以各犯侵匿情狀奏矣。此猶外廷之論。或不足動聖聽。乃東廠則陛下內廷之臣。非如外廷諸臣。與陳增相水火者等也。據奏謂蕭昇陳進才等撥置陳增。不啻斬關之盜。賞

之甚屬不宜。欲將見在衣物變價賑貧。此誠天下至公之論。內外臣工所共稱者。臣以爲陛下當從如轉圓。乃不從其請。而于所存衣物。及有點房屋。仍許給賞。至于撫臣李三才之疏。迄今未發。此或聖母萬壽未及省覽之故。顧同一疏也。同一時也。東廠請止賞。則仍給賞。撫臣請搜賊。則未蒙勅搜。似若亟于賞奸。而緩于發奸者。嗟嗟。知奸而不殛。不如不知。今增之貪惡。內外臣工言之。陛下已知之。乃不惟不殛。而且行賞焉。竊恐此風一播。天下之稅使聞之。皆以爲貪如陳增。賊私敗露如陳增。子弟之縱橫如陳增。陛下猶然加賞。而且任其匿百萬之賊而不究。貪之有利如此。復何所憚而不爲。將舉日畏陛下知覺之心。悉化而爲無所忌憚之心。公行劫奪。不復掩覆。天下之禍。寧有極哉。是陛下此舉。明勸羣盜以斬關。而欲使天下稅使盡爲羣盜也。非所以爲社稷生靈計也。嗟夫。增之惡極矣。播惡六年。流毒數省。所得不知幾百萬。而京師徐州及其原籍。乃增之三大窟。今徐州京師略已搜括。恐猶未盡。若原籍則全然未搜也。試觀郭良輩。特一爪牙耳。娼家萬餘之賊。至掘地丈餘而得之。由斯以觀。陳守綱陳進才等所得賊私。其埋藏之巧。頓寄之多。又不知當何如矣。今國用正匱。饑黎載道。倘片旨搜索。巨賊立得上。可以裕國家之用。下可以賑億萬之命。詎不大快。柰何坐棄不取。而徒以飽豺狼之腹爲也。伏望陛下深思惡不可縱。賞不可濫。巨賊不可輕棄。將點賞陳進才等南城房屋。與所餘衣物等項。容臣等一體會估。盡數沒官。仍急批發撫臣李三才原疏。務盡法根究陳所學。陳所綱。陳進才。蕭昇等。要見載回京師者。藏匿幾何。載回原籍者。頓積幾何。一一追沒入官。爲大工及賑濟之費。庶懲一餘孽。而凡爲餘孽者。懼懲一陳增。而凡爲陳增者。

警。將璫棍斂跡。而天下生靈之困。庶幾其少蘇矣。臣無任悚息待命之至。緣係賞奸非法。餘孽當懲。乞盡沒惡璫餘貲。并批發撫臣原疏。以追匿賊。以正法紀事理。未敢擅便。謹題請旨。

乞貸言官以安大臣疏

巡按直隸監察御史臣葉謹題爲大臣已蒙優禮。小臣似應包荒。懇乞寬貸言官以安大臣。以重言路事。臣等聞大臣者。天子之股肱。股肱所以資輔弼。故禮遇宜隆。言官者。天子之耳目。耳目所以資視聽。故愛護宜周。古稱敬大臣而必繼之曰體羣臣。蓋言臣無大小。總之朝廷之一體。用以共襄政理。所當同仁一視。不宜偏廢。竊重于其間也。近者元輔沈一貫。及次輔沈鯉相繼乞歸。皇上始若難之。一旦溫綸下沛。並聽之歸。且賜之郵傳。錫以鎡幣。不獨成其志。而又恤其私。不獨暴其衷。而又隆其禮。天下聞之。皆榮二臣之遭。而頌聖明始終恩遇之厚。臣等已感激無涯矣。乃南京吏部給事中陳嘉訓。及御史孫居相二臣。並以指摘元輔。忽奉旨切責。于居相則罰俸一年。猶爲薄貸。于嘉訓則降級調外。似所獨嚴。臣等不勝驚駭。以爲陽春之候。何忽有此雷霆。夫二臣之論元輔。聖明自有定鑒。天下自有公論。臣等無容置喙。惟是言官以言爲職。無論其言之當與不當。人主自當優容。卽如天子至尊貴也。而狂戇之臣。猶時有所觸忤。明主亦不以觸忤罪之。何者。重言路也。在天子且然。則輔臣可知矣。況皇上旣聽元輔之去。以明昭雪。元輔業已自快。又爲彼而處一言官。不惟舉朝共訝。卽元輔亦必有惻然不自安者。似亦非所以體大臣之心也。臣頃者恭誦覃恩一詔。卽數十年來。得過諸臣。皇上猶有賜環之許。豈其以見在之言官。而反忍摧折。

之故臣謂有一嘉訓則輔臣諫臣各得其所譬之一堂之上融融洩洩渾然太和若處一嘉訓則大臣誠重而言路日輕將恐臺省之臣從此以言爲戒雖遇當言亦且退避畏縮而不敢言卽皇上亦奚賴焉伏乞聖明垂神三思大恢天度將陳嘉訓俯賜優容免其降調此豈獨爲一嘉訓乃所以重言路開諫諍亦所以曲體輔臣而安其心也臣等無任悚息待罪之至緣係大臣已蒙優禮小臣似應包荒懇乞寬貸言官以安大臣以重言路事理未敢擅便謹題請旨

葉玉城鹽政五疏抗內臣而回天聽斥奸弁以奠商民事詳先生浙鹺紀事中讀者合而觀之足以見當時情事之曲折而先生處之之難也先生自登第後在諫垣者凡二十年其間如鄭一騏等儀真獻店設權之議暨祿沿江內外搜索之請先生疏爭之事得罷又如疏救滿朝薦請懲李成總捕治胡時順廷推李廷機皆侃侃諤諤能人之所不能蓋先生風力嚴毅自其天性余嘗聞諸父老嘉靖時同郡周忠介公怡以論嚴相下詔獄先生年十一憤然曰使余得在朝當請尙方劍斷佞臣頭固宜其居官抗直不畏彊禦如此哉疏艸三卷按行狀四卷老友葉屏垣名必藩以見寄漫漶甚不能盡校爲取若干篇以問世後得善本當更校之嘉慶六年十一月後學趙紹祖識